


CIKONDO CYÀ

ÈKÈLEEZIYÀ WA SEEMÙNÀ

 Taatù mutàmbe kwikala wa Butumbi, tudi ne disànka dilòòlò edi dyà kumanya ne tudi munda mwètù ne Mwoyi wùdì kawùyì wúfwa. Mwoyi wà Nzambi wetù wàkatàpuluka mu ndimì yà kapyà ne kushikama pamutù pàà yònsò wa kùdìbo, ne bònsò bààkuujiibwa tèntè ne Nyumà Mwimpè ne kubangabo kwakula mu myakulu mikwàbò bilondèshile mwàkabàpèèsha Nyumà mwà kwakula. Éyì Taatù, mùshindù mwinè wutùdì tuKusàkidila bwà muWàkaDìpandululà munkaci mwà Èkèleeziyà. Kabyèna bikèmesha to mwàkambà Mukalenge wetù ne: “Mu ditùkù adi nenùmanyè ne Mèmè ndi munda mwà Taatù, ne Taatù munda Mwànyì, Mèmè munda mwènù, ne nwènù munda Mwànyì.” Mùshindù mwinè wùdì Nzambi wa mu Dyulu ùsòmbela munkaci mwà cisàmbà Cyèndè’s wè! “Katanci kakesè aka bàà pa buloba kabààkuMmòna kàbìdì to, kàdì nwènù nenùMmònè, bwalu Nèngìikalè neenù, munda mwènù mene too ne ku nshìikidilu kwà buloba.” Munda mwà cikondo ne cikondo cyònsò cyà èkèleeziyà Wèwè uvwa mwà kwikala kaaba aka, umwèumwè awu makèèlèlè, leelù, too ne kashidi, ne twètù tuvwa mwà kuKumanya ku byenzedi byÛdì wenza. “Bimanyinu ebi nebìfilè aba bàdì bìitabuujà.”

² Mukalenge, pa kumòna—pa kumòna ditòngòbèlè dyà bikondo byònsò, cikondo cìkaadi pabwìpì ne kupàtuka ne Cyèndèlèlè kubangaci. Taatù Nzambi, tudi ne disànka dyàbùngì dyà kumanya ne tudi ne mwoyi mu bàshààdìlè abu leelù ewu; tutàngila nsòmbelu yètù ne tumòna mùshindù wà twipàcìlè tutùdì naatù, tubingilà tutùdì naatù, ne tumòna ne Nyumà Mwimpè mmwangàte bukòòkeshi. Nzambi, swàku bwà muntu yònsò udi mu Bwikadi bwà Nzambi dilòòlò edi àfikè ku dyumvwa bikondo byà èkèleeziyà bitùdì ne mwoyi ebi ne ànyeemenè ne lùkàsà lwònsò kùdì Mukalenge Yesù, bwalu mbifùndiibwe bitòòke tòò, ne: “Dinà dyà Mukalenge didi cibùmbà cìkolè, baakànè bàdì banyeemenaMù ne bàsanganyiibwa mu dikùbiibwa.”

³ Éyì Nzambi wa yààya, lwàku dilòòlò edi ùlaabè buumùntù bwètù, Mukalenge. Lwàku ne balalakanyi, Éyì Mukalenge, bàdì mu cibwejàkàjì cìkolè abu; tàngilàku mikòòkò yìdì mikwàte ne byà luse eyi, Mukalenge, kí mbamanyè cyà kwitabuujà to; kùdì balami bàà mikòòkò bàbìikidila myaba yònsò. Tudi tulòmba, Taatù, bwà bààtèèlejaku Mulami munèna wa cisùmbù cyà mikòòkò awu, Mukalenge Yesù, Nyumà Wendè munèna awu ngudi wakula dilòòlò edi, wàmba ne: “Wèwè mwan’Àanyi, lwàku

kùNdi ne Mémè nênkupèeshè Nsabatu, Diikisha didi dikutwà citampì ku kwèbè kwà Cyendèlèlè kúyaaya.” Bwà kubènga kutànkakajiibwa eku ne eku pa buloba patùdì tumòna cikondo cyènda cìjika mpindyewu apa. Enzàku nànkú’s, Taatù. Akwilàku kùdì mwakudi, tèelejilàku mu maci à aba bàdì bàtèeleja, bwalu twètù bònsò tudì munkaci mwà kutèeleja. Mu Dinà dyà Yesù mmutùdì tulòmba emu. Amen.

⁴ Nudi mwà kusòmbaayi. Mpindyewu, dilòlò edi tudì tulongela ku cikondo ciibìdì cyà èkèleeziyà. Ndi mmòna bààbùngì bàà kùdibo bàfùnda bintu ne bikwàbò, nènku ki bwà cinyi ndi muswè kwikala kutòokèsha cyòci eci musangu wònsò.

⁵ Mpindyewu, cikondo ciibìdì cyà èkèleeziyà cyàkabiikidiibwa ne ncikondo cyà èkèleeziyà wa Seemùnà. Ne ciwva cyenzèke, Cikondo cyà Seemùnà aci, cyàkabanga musangu wùm wèwùm wè wàkajikà Cikondo cyà Efèsò awu. Cikondo cyà Efèsò ciwva kubangila ku cidimu cyà 55 cyà paanyimà pàà lufù lwà Yesù too ne ku cyà 170 paanyimà pàà lufù lwà Yesù. Cikondo cyà Seemùnà cyàkabanga mu cidimu cyà 170 kuyaci too ne ku cyà 312. Èkèleeziyà ewu ng’èkèleeziyà mukèngèshiiibwe; ewu udi uvwàla cifulu cyà butùmbi cyà mufwile diitabuuja awu, ng’èkèleeziyà wa dikènga dinène. Ne mulayi wa Nzambi kùdiye, kùdì Èkèleeziyà Musungula munda mwàci, ùwva mbwà kumupèèsha cifulu cyà butùmbi cyà Mwoyi.

⁶ Èkèleeziyà ne èkèleeziyà yònsò ùwva ne *mùtootò* wùvwà mukwàta mu cyanza cyà Nzambi, wùvwà wùleejà “mùsànjeelà” mutùmina cikondo cyà èkèleeziyà aci. Wa mutàmbe bwìmpè wùndiku mùfwànyine kwelela meeji ne ùwva mùsànjeelà wa cikondo cyà èkèleeziyà wa Efèsò (bwalu Bible kèna wàmba ne ùwva nganyì to) ùwva m’Pòlò; bwalu yèyè ngwàkiimanyika èkèleeziyà wa beena Efèsò ne yèyè nguvwa mwambi wa cikondo cyà èkèleeziyà aci; wàkatwàdila Èkèleeziyà Bukènkè, bwalu Yone Munsantu wàkabwàngacila kwòkò aku. Ne pashiishe Polycarpe, ànu nànkú too ne . . . Polycarpe’s wè, too ne kwìnshì.

⁷ Mpindyewu, Cikondo cyà Seemùnà, ngeela meeji mu byònsò . . . bìndiku mèmè mupetè mùshindù wà kupeta, ùwva ny’Irénee. Nènku mpindyewu ndi muswè kunwàmbila bwà cinyi ndi musungùle Irénee pamutù pàà Polycarpe. Mpindyewu, bààbùngì bàà ku balombodi bònsò bàà èkèleeziyà (ne balongeshi bàà Bible) mbaswè kwela meeji ne mwanjèlo awu ùwva m’Polycarpe. Polycarpe ùwva muyiidi wa Yone Munsantu, aci ncilelèlè. Kàdi Polycarpe ngwàkatwà citampì . . . yèyè—yèyè nguvwa mufwile diitabuuja, bàakamucimpika keelè mu mwoyi ne bàakamushipa. Mpindyewu, kàdi yèyè ùwva muntu munène, muntu wa luumù, muntu wa difwàna dyà Nzambi, wa kalolo. Kakùyì mpatà to umwe wa ku beena Kilistò bàà batàmbe bunènè bàà kacya twàpeta. Ne kakùwva cintu cibì nànsha cimwè cyùvwàku mufwànyine kwamba bwà wendè nsòmbelu to.

⁸ Cìndi musungwìle Irénée: mbwalu ndi ngiitabuuja ne Irénée ùvwa mutàmbe kwikala museemène ku Mifùndu kutàmba Polycarpe. Bwalu Polycarpe ùvwa bu mweyèmène ku mmwènenu wa cyena Loomò wa kujuula kwà bulongolodi kampànda. Kàdi—kàdi Irénée yèyè ùvwa ùcibènga wòsha ne munu mwìkù, yèyè wàkacìdyula bikolè be. Ne pashìishe, mutùdi bònsò bamanyè, cilumbù cinène cyà bàkòkangana cìvwa cilwa ku Nsangilu wa Nicée; cìmwè cyà ku bilumbù binènè byà bàkòkelanganapù cìvwa cyà ne Nzambi ùvwa bàsàtù anyi Nzambi ùvwa *umwe*. Ki Irénée kwangatayè luseke lwà ne Nzambi ùvwa Nzambi, mpindyewu, ànu Umwèpelè.

⁹ Ndi mufwànyine kubala mu *Baataatù Bàà Kumpàlà Kwà Nicée*, mupimbu wà kumpàla, dibèjì dyà 412, ànu kaadiyì kamba kakesè cyanààna; nwènù baswè kufùnda aci, mupimbu wà kumpàla wà *Baataatù Bàà Kumpàlà Kwà Nicée*. Nènku mu dibèjì dyà dikùmi ne diibìdì, cìdi. . . Nwènù baswè mupimbu awu, nciitùpà cyà ndekeelu cyà mupimbu mwisàtù. Nudi bafwànyine kubala cintu cyònsò aci mu kaabujimà; mùdi nshapitá búngi cyanààna, anyi byambilu búngi cyanààna. Mpindyewu ndi mbanga kubadila ku yà ndekeelu—ànu ku mvensà yèndè makùmi àbìdì, anyi mvensà makùmi asatu yà ndekeelu. Ncyàkumubala yònsò to, kàdi ànu citùpà cyèndè cyanààna:

“Byà momùmwè byakwidi bikwàbò byònsò abi biikàle. . . bìpàtula mwànzù wa Kampànda umwèpelè ne umwèumwè awu;” (Nwamònu’s, ùdi ùteeta kwamba cìvwàbo bàMubiikila ne: “Taatù, Mwànà, ne Nyumà Mwìmpè,” ne kwambayè ne: “Ayi *mmyânzù*, kí mmènà to, myânzù yà Kampànda Umwèpelè awu.” Kì cyòci aci menemene citùdi tulongesha leelù ewu.) “bu mudi, bu cileejilu” (ne pashìishe mu tubòkò) “(mu Anglais), *Mukalenge wa Bukolè, Mukalenge Taatù wa bwònsò, Nzambi wa Bukolè bwònsò, Mutàmbe bunène wa mu Dyulu, Mufùki, Mwenji*, ne byà nàнку awu abi. Ebi kí mmènà ne myânzù yà dilondangana dyà bantu bashiilàngàne to, kàdi yà umwèpelè ne umwèumwè awu,” (Amen!) “ku dìnà dyà Nzambi umwèpelè ewu, Taatù, udi. . . Yèyè—Yèyè udi bintu byònsò ebi. . . upèesha bònsò. . . diikalakù, dyèsè dinène dyà diikalakù.”

¹⁰ Irénée ùdi wàmba ne “Myânzù yònsò eyi mmisangisha mu Dìnà dimwèpelè, mwinshì mwà Nzambi umwèpelè, ne yìdi ànu myânzù yà cìvwàYe aci.” Ùvwa Rose wa Shalònà. Kì cìvwàYe ncyòci aci. Awu’s mmwànzù. Yèyè ùvwa Mùtootò wà mu Dindà. Ùvwa Alpha. Ùvwa Omega. Ayi’s mmyânzù yà cìvwàYe. Yèyè ùvwa Taatù. Ùvwa Mwànà. Ùvwa Nyumà Mwìmpè. Kàdi kùdi Nzambi *umwèpelè*. Nzambi umwèpelè, ne Dìnà Dyèndè dìdi Dimwèpelè. Nènku kì cìndi mèmè mwelèle meeji ne Irénée nguwva mwambilemù mu ditaata dyèndè—dyèndè dyà cilumbu aci kaaba aka, anyi dyumvwija dyà Mufùndu awu.

¹¹ Cìkwàbò cintu cìndi muswè kunùbadila, cìdi cìsanganyiibwa

mu mukàndà ewu: *Mmunyi Mwàkenzekaci?* Ne eci nkùdi bafùndi bàà maalu-malonda. Nenku: *Mmunyi Mwàkenzekaci?* kùdi R. C. Hazeltine, maalu-malonda à èkèleeziyà yà ku cibangidilu. Kàdi apa mu dibèji dyà 180: “Mapà À Nyumà Mu Cikondo Cyà Irénée, cidimu cyà 177 too ne ku cyà 202 paanyimà pàà lufù lwà Yesù.” Mpindyewu, cìndi ntèelela cyôci eci, cìyaaya pa mikàbà yà mèyi, nudi numòna’s, ne—ne necyàngaciibwè cìfùndiibwè mu mikàndà:

“Mùvwa mmu cikondo cyà Irénée mùvwà èkèleeziyà wa mutàmbe kwikala wa Cìipostlò wa mu France mwikàle ne mapà ònsò à Nyumà Mwìmpè.” Cìvwa nku dilongesha dyèndè, nwamònu’s. “Bidimba byà èkèleeziyà wa Irénée ku Lyon,” n’Lyon, mu France, “bàvwa bààkula mu myakulu. Kacìvwa cintu cyà pabwàci to bwà kumòna muntu mufwè wàlukila ku mwoyi. Dyondopiibwa òvwa—dyondopiibwa òvwa cintu cyà cyènzekenzeka matùkù ònsò mu butangadiki bwònsò... èkèleeziyà yà butangadiki myaba yònsò.” Irénée awu’s òvwa mumanyè mwà kulongesha! “Bishimà bìvwa byènzeka misangu ne misangu. Bwà kwamba menemene, èkèleeziyà ayi kayìvwakù yìpanga kwikala ne dimwènesha dyà bwikadi bwà Nzambi ku bishimà anyi ku bikèèna-kumòna, diimanyika dyà bintu byà mu bufùki, ku cishimà, bwà kuvùlwija beena Kilistò bàà mudimu wà butangadiki bàà mu ditùkù adi ne, bàvwa bayiidi Bèndè bananga. Kàdi ku maalu-malonda à matùkù à kale, katwènakù mwà kwangulula kasangu nànsha kàmwe kàà dijuula dyà bafwè mu èkèleeziyà wa kumpàlà wa cyena Loomo awu to.”

¹² Abu mbantu bàdi kabàyi. . . kabàyikù bàjinga byà elu luseke anyi lwàlwa to, bôbò bàdi bàmba ànu bulelèlè. Bôbò mbafùndi bàà maalu-malonda.

¹³ Ki bwà cinyi ndi mêmè ngeela meeji ne Irénée, bwalu, nudi numòna’s, òvwa ne diitabuuja dimwèdimwè òvwa Pòlò ne bayiidi batùpèeshe adi’s. Ki bwà cinyi mêmè ndi ne. . . ngeela meeji ne yèyè nguvwa mwanjelo wa èkèleeziyà wa Seemùnà, bwalu yèyè òvwa. . . òvwa ne malongesha àmwèàmwè à mu Mifùndu awu; ne malongesha àmwèàmwè à mu Mifùndu pa bishimikidi byà Dìyi dyà Nzambi nebitwalè cintu cimwècimwè aci musangu wònsò. Bu nwènù mwà kwangata ànu cyanààna mèyi àdi àkèngelà kwamba à Nzambi ne kuàkùmbaja ku dileeta ne ku dileeta, cìdi èkèleeziyà yàmba nànsha ciikàle cinyi, ucìlonda ànu mùshindù wùdici cyambè awu, necìtwalè cintu cimwècimwè aci. Nènku’s ki cyôci aci cyàkenzà Irénée.

¹⁴ Mpindyewu, ndi ngeela meeji ne Polycarpe òvwa muntu mwìmpè maalu, ndi ngumvwa nànkù; kàdi ndi ngamba ne yèyè òvwa mutàmbe kweyemena ku òvwija dyà èkèleeziyà bulongolodi, nènku ànu mùvwà beena Nikàlàwù bènza amu. Bàvwa bôbò bàvwija èkèleeziyà bulongolodi, ne—ne kusanga pàmwè kwà bwàna bwètù. Bidi bimwèka ànu bìmpè mu mùshindù wà mamanya à mu mutù, kàdi, nudi numòna’s, Nyumà

ùdi kule menemene ne mamanya à mu mitù awu mu mùshindù wà ne . . . kuyikù nànsha mene mwà kwela meeji bímpè ku—ku Nyumà to. “Meeji Àanyi matùmbùke mmatàmbe ènù meeji,” mùdi Nzambi wàmba. “Yanyi njila mmibànde kutàmba yènù njila.” Pa nànkù kùdi mùshindù ànu wùmwepèlè wà kwenza cyòci aci; kuMulonda ànu cyanàànà ku dizòla. Ncyà bushùwà.

¹⁵ Mpindyewu, tudi bafwànyine kwela meeji ne, wèwè mwà kuumuka apa . . . Bu ne mvwa nya ku Chicago dilòòlò edi, mvwa mufwànyine kupàtuka apa kuya kadikèbela kaleeji-nord, kwamba ne: “Mpindyewu, twànjibi kumòna tǔng, Chicago’s ùdi ùsanganyibwa lwà eku. Èyo, nêngàsè ànu lwendu nye.” Ncyèna mufwànyine kupàtuka mu Jeffersonville to. Nwamònu anyi? Bikèngela mpetè kartà kàà njila. Nènku kùdi—kùdi mwaba . . . njila mulongolola bwà ngaamòna mwà kuya ku Chicago mu mèbà àsambòmbò anyi mwandamutekète à lwendu lwà mu kàshinyi, kàdi ncyèna ànu mwà kukòsa njila kanà yònsò ewu to. Ndèkè kènà ànu mwà kukòsa njila kanà yònsò ewu to. yèyè ùdi ne nji—njila wa mu lupeepèle anyi butùmbùke kampànda ne bikwàbò bùdi bukèngelà bwà kubùukayè, bwà mu bipidi bùngì kampànda mùdi mùkèngelà bwà kushààlayè.

¹⁶ Kùdi njila museba, ne Nzambi ùdi ne njila kampànda. Nzambi ùdi ne njila bwà Èkèleeziyà Wendè, bwà cisàmbà Cyèndè. Ne kacya Yèyè kàvwakù ne meeji à kwikalaYè mukòntonona kùdi baapaapà, baakàrdinalè, barkèèpiskòpò bàà batàmbidile, anyi batàngidi banènè to. Nyumà Mwímpè ngudi Ndeejì wa Èkèleeziyà wa Nzambi udi ne mwoyi, bwà kuMukolesha. Nènku bunsantu bwònsò kabwèna bùya kùdi kàrdinalè anyi nsaserdòsè, bwà kumuvwiya muntu munsantu mu—mu èkèleeziyà, anyi ní ncinyi cyònsò to. Beena kwitabuuja bàà pàtupù’s bàdi ànu ne bukenji. . . bukenji bwà menemene kùdi Nyumà Mwímpè mùdi muyiishi kanà yònsò ewu, mpaasàtà, mulami, mulubuludi, anyi ní nganyi mukwàbò. Beena kwitabuuja bàà pàtupù aba’s!

¹⁷ Kàdi cidìbo bacibùikidila ne *mbeena Nikàlàwù*, bu mutwàmònu makèlèlè dilòòlò awu, *mwena Nikàlàwù*, tuvwa basùnsùle mwakù awu, bawàngacilè mu cyena Ngelikà, ne n-i-c-k-o awu, ùvwa ùmvwiya *nikao*, ciikàle cyùmvwiya ne “kucimuna, anyi kunyènga bukòòkeshi.” Cinyi? N-i-c-k-o, mwena Nikàlàwù, *beena kwitabuuja bàà pàtupù*, “kucimuna beena kwitabuuja bàà pàtupù,” ne kubànyènga bukòòkeshi mu kubàpèèsha díyi ditùma dyà bantu, balombodi bàà èkèleeziyà bàvwà mwà kubalongesha, bàvwà mwà kwikala ne dyoya dyà myandà dyàbò sungasunga. Awu ki mùshindù wùvwà Nsangilu wa Nicée mulombòdìibwe. Bwalu bààbùngì bààkadisanga ne kulongololabò díyi ditùma mu Nsangilu wa Nicée amu. Katwèna . . . katwèna baswè kwakula bipitèpìte bùngì pa bwalu abu to, bwalu aci ncyà mu diinaayi dilòòlò, cyà mu Nsangilu wa Nicée aci.

¹⁸ Kàdi ki mwaba ngwôwò awu wàkenjiibwà Èkèleeziyà wa Kàtòlikè wa cyena Loomo, mupàtùkile mu kasumbù kàà bantu bàvwà bakùdimwisha mucimà kùdi Pòlò Munsantu, ne Irénéé, ne Martin Munsantu, too ne kwinshì. Bàvwa beena Kilistò bakùdimùne mucimà kùdi. . . buumùke ku bumpàngaanù bayè ku bwena Kilistò, kàdi baswè kukòka èkèleeziyà kumwaluja mu mmwènekèlu wa mudimu wà bwambi wà Dipungila Dikùlukulu, bu mùdi kwikala ne baakwidi banène, ne—ne dishiilangana dyà nkwasà dyà ciipostòlò, bu mùdi byà ne paapà ùshiila mukwàbò paapà, mukwàbò paapà. Bu twètù mwà kùkèbulula mu Bible mujimà emu, s'nudi bafwànyine kujandula ne aci mbulelèlè ànu bwètù bwà menemene ebu ne mwàkapiishà Nzambì cintu aci kacya ku cibangidilu aku mene; nènku cikondo cyà èkèleeziyà cyà dilòlò dyà makèlèlèlè adi, mwambè ne: “Mémè ndi mucikine!” ne Èkèleeziyà mucikine pèndè.

¹⁹ Kacya Nzambì kàvwakù ne meeji à Èkèleeziyà kulombodiibwayè kùdi bantu nànsha. Nzambì ngudi ulombola Èkèleeziyà Wendè, ne Ùdi ùmulombwela ku mapà à Nyumà. Mapà à Nyumà àdi mu Èkèleeziyà bwà kulongolola nyumà. Ùdi ne midimu ya bwambi yitaanu mu Èkèleeziyà Wendè. Bàà kumpàlà bàà ku bóbò mbàpostòlò, anyì, bampandanjila. Mpandanjila ki dibiiikila dyà ditàmbe kutumbuka didiku, mùpostòlò. Mwakù ewu *mpandanjila* wùdi wùmvwija ne “mutùmiibwe”; *mùpostòlò* mbwena kwamba ne “mutùmiibwe.” Cyàkasungwilàbo bwà kubiiikidiibwabò ne mpandanjila, mémè ncyèna pàanyi mumanyè bwalà. Kàdi mbàpostòlò. Eyo. Bàpostòlò, baprófetà, balongeshi, batangadiki, bampaasàtà. Mpindyewu, ayi ki midimu misungula ya Nzambì mitùmina Èkèleeziyà Wendè.

²⁰ Pashiishe mu èkèleeziyà yònsò wa pa kaaba mùdi mapà à Nyumà citèemà àdi àlwa munkaci mwà bantu, mbwena kwamba ne, dimanya, lungènyi, mapà à dyondopa, dyenza dyà bishimà, dyakula dyà mu myakulu, dyandamuna dyà myakulu. Ne bintu byònsò ebi bìdi biya mu mubidi ne mubidi wà pa kaaba. Ne muntu yònsò mu èkèleeziyà udi ne mudimu wa bwambi wà muntu-nkààyà, ne mudimu wà bwambi wà muntu-nkààyà awu wùdi wènda pàmwè ne mikwàbò midimu ya bwambi, bwà kwibaka Mubidi wà Yesù Kilistò. Nènku kacya. . .

²¹ Mpindyewu, vùlukàayi eci ne, eci cidi. . . Nèngèlè milongo eyi dilòlò edi. Èkèleeziyà wa kumpàla, Efèsò; Seemùna, Peegàmò, Twatilà, Saadi, Filàdèlèfiyà, Laòdikiyà. Mpindyewu, vùlukàayi pàdi eci citungunuka apa ne, ewu èkèleeziyà ùvwa ne kaabujimà kàà Nyumà, kàdi kundekeelu kwà cikondo cyà èkèleeziyà tуди tusangana ne Ùvwa musàkiibwe pambèlu. Cikondo cyà èkèleeziyà cìvwà cilondèle cyàkasàka kàbìdì ndambù; kàbìdì ndambù; too ne ku eci nùku, kùvwa ànu katobà kakesè menemene. “Udi ne ndambù wa bintu,” mwàkambàYe. Kaa, patwàfikà ku Cikondo cyà Èkèleeziyà cyà Twatilà aci's wè!

²² Mpindyewu, paanyimà pàà aci cimanè kulwa, Nzambi wàkajuula mwena Allemagne dìnà dyèndè Martin Luther wàkaaluja cyàkàbìdì Èkèleeziyà awu. Wàkabanga cyàkàbìdì ndambù, kuyiishayè Dibingishiibwa; pashiishe kulwaku Martin Luther, kuyiishayè Dibingishiibwa. Pashiishe kulwakù John Wesley ne kuyiishayè Dijidiibwa. Pashiishe *apa* mu eci cikondo cyà èkèleeziyà, bàakaalukila buludì ku Dibàtiiza dyà Nyumà Mwîmpè, ne bimanyinu bimwèbimwè abi ne maalu à kukèma, bipweka buludì. *Apa* ki pàakapàtukilàye è kupicila mu bidimu cinunu ne nkàmà yìtaanu byà Bikondo Byà Mîdimà. Ne ki mwômò amu mùvwà mutambe kwikala mîdimà . . . anyì cipungu citàmbe bule cyà èkèleeziyà citùkaadiku bapetè mu bikondo byà èkèleeziyà. Pashiishe pòpò *apa ki* pàdici cibanga kujuuka, Dibingishiibwa, Dijidiibwa, Dibàtiiza dyà Nyumà Mwîmpè. Ne Bible mmwambè ne: “Ku ndekeelu kwà *eci* cikondo, ne banyaàbanya bakesè aba nefafimpakajiibwè panshì bwalu èkèleeziyà umwèumwè wa Mpenta awu neàbangè kwenza cintu cimwècimwè cìvwàbo babangè kwenza *apa* kale aci, beena Nikàlàwù.” (Èyi Nzambi, ndamèku mukana mubwikila too ne pàngààfikà ku cyòci aci.) Nudi numòna anyi? Cìndì mwà kumòna mwaba awu aci. Nwamònu’s, too ne panwìkalà mwà kumòna apa. Nènku nènñuleeje ne musànjeela mutùmina eci cikondo cyà èkèleeziyà neàkinè màngumba. Nyumà awu neàjuukilè mu bânà. Ki mùtùbi misangu yònsò. Nènku mpindyewu tudi ne . . .

²³ Mpindyewu, bu nwènù mwà kumòna eci, mùvwàYe munène apa, kupàtuka, ne ndekeelu wa byònsò kuMufinakaja kumulòpola yònsò. Pashiishe Cyòci kubanga kwalukila. Luther kuCikòkayè paanyimà, Dibingishiibwa; Dijidiibwa; Dibàtiiza dyà Nyumà Mwîmpè; ne pashiishe ànu ku ndekeelu kwà cikondo, ùdi ùMupàtakajila panshì, mu mùshindù wà ne Eci ncyambè kujìma ànu cyònsò, kùkaadi ànu kantu kakesè menemene mwaba awu, ne ki pàdiye wèla lubilà lukolè ne “Yèyè kàyi mwipìdije mudimu awu bwà bwalu bwà Basungula to, kakwàkwikala musunya nànsha mukèsè wàsungidiibwà to.” Nwamònu anyi? Ki bwalu mbwòbù abu’s, ànu ku cikondo cyà nshiikidilu mene. Mpindyewu lamàayi aci mu meeji.

²⁴ Mpindyewu netwìkalè mwà kubanga Cikondo cyà Èkèleeziyà wa Seemùnà eci. Dyàmbedi ndi muswè kucisùnsulula pa dibèji kampànda dìndì—dìndì naadi edi. Mpindyewu, cikondo ciibìdì cyà èkèleeziyà cìvwa n’Seemùnà, ne ndi ngeela meeji ne nwènù bònsò nenùtwe ku cyànyì (anyì ndi ntèkemena ne nudi batwè ku cyànyì, nànsha byà ndambù, mwine’s) ne Irénée nguvwa mùtootò mutùmina cikondo cyà èkèleeziyà aci. Yèyè nguvwa mùsànjeelà wa Nzambi awu bwalu mmusaasulùjè ditungà dijimà adi, mu France (mu Gaule), muntwamu, ne yèyè wàkashìndamija maèkèleeziyà, ne yònsò wa ku òwò ùvwa mushìndamija pa dibàtiiza dyà Nyumà Mwîmpè, dyakula dyà mu myakulu, dibiishà dyà bafwè, dyondopa dyà babèedi,

diimanyika dyà mvùla, ne dyenza dyà bishimà ku ditùkù ne ku ditùkù. Bàvwa bamanyè ne Nzambi udi ne mwoyi ùvwa ne mwoyi munkaci mwà cisàmbà. Awu nguvwa mulùme wa Nzambi, bwalu Yesù wàkamba ne: “Muntu nànsha umwe kèna mwà kwenza. . .” Anyi, ba—bantu abu mbàvwà bambè ne: “Muntu nànsha umwe kèna mwà kwenza byenedi ebi Nzambi kàyì nendè to.” Ùvwa n’Nikòdemè wàkambila Yesù nànkù.

²⁵ Mpindyewu, cimenga cyà bungèndààmùshingà; cipàtukidi cyà bungèndààmùshingà bwà kuya ku Lydie ne ku wesètè. Cimenga ciisàtù cyà citàmbe bunène mu Asie, cimenga cinènè cyà ku cisabù. Cimanya bwà bubanji, ntempèlù, nzùbu, bilongelu, manga à lwòndapu ne maalu à mamanya. Beena Yùda bàvwa basòmbèle mu—mu Seemùnà, ne bàvwa bàyiisha èvànjeeliyò kùdi beena mu Seemùnà. Polycarpe nguvwa mwèpiskòpò wa kumpàla wa Seemùnà. Polycarpe ne bakwàbò basadidi bàà lulamatu bààkashindamija diitabuujà dyondòke dyà Nzambi mu beena kwitabuujà bàà mu Seemùnà. Baataatù bàà ku cibangidilu bàà èkèleeziyà bàvwa bàfila dikànkamika dyà Bulelèlè kùdi Seemùnà.

²⁶ Cikondo cyà èkèleeziyà wa Seemùnà, dìnà dyà èkèleeziyà awu òvwa n’Seemùnà, *Seemùnà*, èyowà’s wè, cidi cyùmvwija ne “bululu,” muulà. Nciswikàkàne ne lufù, bwalu bàvwà bàpunga ne lufù.

²⁷ Èkèleeziyà mukèngeshiibwe, Nzambi wàkabàbiikila ne “mukèngeshiibwe.” Nzambi wàkatàngija mèsù pa makèngeshiibwa àbò, ne wàkafila ngàsà bwà kuàtwalabò. Wàkatàngija mèsù pa makèngeshiibwa àbò, ne kubàpèèsha bucimunyi pa lufù. Wàkatàngija mèsù pa bupèlè bwàbò, ne kubàpèèsha mabanji munda Mwèndè. Èkèleeziyà wa Seemùnà wàkapicila mu cikùtù cyà kapyà cyà makèngeshiibwa, kàdi, cìvwa mmupùyà wà dipembu dimpè kùdiYe. Ki Bàshààdilè abu mpindyewu, kì ng’èkèleeziyà wa beena Seemùnà yònsò mu kaabujimà to; ànu Bàshààdilè abu mbàndi ngamba. *Matùkù* manène *dikùmì à dikènga dinène* awu mbwena kwamba ne “bidimu dikùmì byà dikèngeshiibwa dyà mashi ditàmbidile.”

²⁸ Ncyèna mumanyè ní ndi mwà kwamba dìnà edi ku dileetà ku dileetà, anyi kudishindumuna, anyi to. Ewu nguvwa mfùmù wa bukalenge bwalàbàle mu cikondo aci, ngeela meeji ne yèyè nguvwa mwedi wa mashi panshi wa mutàmbe bunène ku bònsò kacya ku Néron mu cidimu cya 67: D-i-o-c-l-é-t-i-e-n. Mu bidimu byà kuumukila ku cyà 303 too ne ku cyà 312 paanyimà pàà lufù lwà Yesù.

²⁹ Nzambi ùdi ùkànkamika Seemùnà bwà kwikalayè ne lulamatu too ne ku lufù, mwàkadìYe Yèyè amu ne: “Nènku Nènkupèèshè cifulu cyà butùmbi cyà Mwoyi, mùdi Taatù muMpèèshe.” Nzambi mmulayè mucimunyi (mu makèngeshiibwa à makolè) bucimunyi pa lufù lwibidì ne:

“Kanùciinyi aba bàdì mwà kushipa mubidi to, kàdi Ewu udi mwà kubùtula musùùkà, anyi, kushipa musùùkà.” Cìdi... Bivwa bikèngela bwà beena Seemùnà kunànukilabò too ne ku ndekeelu: “Kùciinyi bantu nànsha, nènku cifulu cyà butùmbì cyà Mwoyi necikupèèbwè.” Dikèngeshiibwa dyà bwena Kilistò mu bikondo ndifwànyikijibwe mu bikondo byà èkèleeziya, dyà Seemùnà, mbyà mushinga wàbùngì be. Netùswe bwà kukùfika ànu mu katanci kakesè emu, bu Mukalenge mwà kwanyisha.

³⁰ Mpindyewu, bàmwè bàà kunùdì bìmwè byà ku byòbì ebi byòbì bibàpìte... mèmè mubifunde ndambù ne lùkàsà lukolè byà bakwàbò bàà mu kàlaasà emu, dîbà adi netwikalè... tudi... mbushùwà ne nudi mwà kubìpetela kutùdì dîbà kanà dyònsò dinùdì baswè kubìpeta adi, netwikalè ne disànkà dyà—dyà kunùpèeshabì. (Mfwilaayikù luse.)

³¹ Mpindyewu mu nshapità mwi2 ku mvensà wa 8, nkutùdì tubangila dilòlò edi. Mpindyewu, mpa cinyi patùvwà baMushiile makèlèlè dilòlò awu? Mbushùwà ne yèyè ùvwà... mukine byà bwena Nikàlàwù abi. Ncyà bushùwà anyi? Mpindyewu cìdì Nzambì wènza ncinyi? Cìdì cikèngela bwà twètù kwikala bajandule dyàmbedi ncinyi? Dibuuuludiiibwa dyà Yesù Kilistò, dyà ne Yèyè ùdì Nganyi ne Yèyè ùdì cinyi. Mpindyewu cintu cinènè cìdì cìlondà, tudi tujandula ne Yèyè ùdì ùkina cintu kanà cyònsò cìikalà mwà kutèeka cintu kampànda bwà kukòkeshaci Èkèleeziyà Wendè pa kuumusha Yèyè mwinè. Yèyè ùdì Nzambì wa mukàwù.

³² Mùshindù mwinè wùndì njinga kwimanyika's, bwalu tudi ne mvensà ànu yinaayi cyanàànà kaaba aka, ànu bwà kutèèla kaacintu kampànda kakesè. Mbanganyi bàdiku mwà kuvùluka pàvwà mupròfeta mwimpè, Samwèlè awu, pàvwà Izalèlèlè mujimà úswa kwenza maalu mùdì bakwàbò bàà pa buloba amu? Nudi bavùlùke aci anyi? Ki mupròfeta kubàmbilayè, wàmba ne: “Nudi bapìile!” Kàdi bàvwà bàjinga kwenza maalu bu beena Pelèshètè, ne mùdì ba—bakwàbò abu. Èè, ki cyòci aci menemene cyàkenzekà mu cikondo cyà kumpàlà cyà èkèleeziyà eci. Mbyà bikèmeshà mùdì bantu kabàyi baswè bwà Nzambì àbàlombòle. Bòbò mbaswè kulonda... mbaswè muntu kampànda. Izalèlèlè, wàkenza cìlèrà cyà citàmbe bunènè cikaadiyeku mwenze, pàvwà... Ngàsà ùkaavwa mubàpetela mupròfeta, mulombodi, mubàlongolwèlè mwànà wa mùkòkòkò bu difuta dyà cibawu, ne mubàlongolwèlè cyàkudyà cyà mu mauulu, ne bintu bimpè byònsò bivwa ngàsà mubàlongolwèlè abi, kàdi nànsha nànkù, mu Ekèsòòde 19, bàvwà baswè mikenji. Bàvwà baswè kuvwijangana ba-docteurs mu bunzambì, ne kupeta bantu kampànda, bàvwà baswè kwikala pààbò ne cintu kampànda cyà dyenzaMù.

³³ Muntu ùtu misangu yònsò ànu ùkèba bwà kutàmbe Mufùki mwine wàkamufùka awu ku meeji, pèndè kèna ne cidiye wènza nànsha cimwè to ànu kudishebeya yèyè mwinè. Ànu mùmvwà muiyishè kùkaadi maadyàlumingu ndambù pa—pa *Ntèndeleeleu*

Musopakaja. Ne aci's mmwômò menemene. Panùdi nusopakaja cintu kanà cyònsò eci, kacýènakù mwà...bwàci mbutùúke! Kwàjikì, kacýèna mwà kwalukila kàbìdi to. Kampundu kakèènakù mwà kulela cyàkàbìdi ne kupeta kampundu kakwàbò to, bwalu kòkò—kòkò nkampundu, ndimiinu disopakaja. Ditalà dilenga, kwèna mwà kupetela ditalà dilenga ku ditalà dilenga disopakaja nànsha. Kàdyàkwikala nànsha...Ndifwànyine kutòloka, kàdi didi—didi, kaa, kî ndimpèku to nànsha kakesè. Kwèna mwà kacýènzakù to. Cyònsò cidi cisopakaja kî ncimpèku to.

³⁴ Ne ntèndeleeleu musopakaja kî mmwimpèku to! Paucìdi ànu uteeta bwà kusàkidila cintu kampànda ku cidi Nzambì mwambè, anyi wènza cintu kampànda cidi Nzambì kàyi muswè bwà wèwè kwenza to, awu nntèndeleeleu musopakaja. Ncifwànyine kwikala ne mmwènekelu mulenga. Kaa, ditalà disopakaja nedìikalè ne mmwènekelu mulenga kutàmba ditalà dyà mu bufùki. Kampundu kàà kale nekènzè mudimu kutàmba wà tubalù túbìdi. Èè, aci's... Kî nku dyenza dyà mudimu to, mwanèètù, ku ngàsà ncutùdi basungìdìibwe. "Kî nku byenzedi kutùdi basungìdìibwe to, kàdi nku ngàsà." Pa nàнку aci ncifwànyine... Ndi ntèkemena ne kanwèna nwela meeji ne mèyi aa... Udi—udi musòmbe mu cikondo cyà diteeciibwa dikolè, ne mèmè ndi—ndi ncyùmva kùneeku eku. Nudi numòna anyi? Bwalu kùdi ba—Presbytériens, ba—Méthodistes, ne bàà mîshindù yònsò mwab'ewu. Aci tudi bamanyè. Nènku ndi—ndi ncyùmva. Ne bikèngela wikalè wololokakù ndambù ku musangu ne ku musangu, bwà kudyùmushaci, mùshindù awu.

³⁵ Mpindyewu, tèèlejàayi. Cintu cyònsò cisopakaja eci kî ncimpèku to. Bikèngela wàngatè cyà ku muji, mùshindù wùdi Nzambì mucýènzè awu, dîbà adi udi ne cintu cyà cilelèlà.

³⁶ Mpindyewu, tudi tusangana dîbà adi ne èkèleeziyà wa Izalèèlà ewu, pàvwàbò bàpita bènda bàya apu, Nzambì ùkaavwa mubàdìishèdìishe, ne mubàkùbèkùbe, ne mubènzèlènzèle bintu byònsò. Kàdi ndekeelu wa byònsò kutàngijabò mèsù kùdi beena Pelèshètè, ne beena Amòlà, ne... ne bashìlèshìlàngàne abu, ki bòbò ne: "Tudi baswè mfùmù! Bàdi ne cintu kampànda citùdi twètù katùyi naaci to."

³⁷ Ki cintu cìmwècìmwè cidi bantu bènzà leelù ewu ncyòci aci. Umwe wa ku aba, bàna bèètù bàà bakàji aba, neatangilè ku tèlèviziyò bwà kumòna Gloria Swanson, anyi ní nganyi yònsò udibò... bàmwè bàà ku bakàji bàdi bavwàle nkanzu wa mùshindù kampànda abu, ne bòbò kabàyikù ànu mwà kucitwàla to ànu pàdìbò bàmupeta. Nwamònu anyi? Wèwè umòna mukàji kampànda mu ville ne: "Kaa, awu kî mmulenga anyi?" Cidiye muvwàle ncifwànyine kukwenzela cinyi? Bantu, bàdi ànu nàнку awu, mèmè's ntu mwambè ne nditùkù dyà—dyà ditentulangana, muntu muswè kutentula mukwèndè. Wangata... Kùdi ba—Elvis Presley búngì cyanààna mpindyewu, ndi—ndi nnwàmbila,

kùyikù mufwànyine kubùngwija mu màkaadikà to, bwalu ùkaadi mulwè mumanyike mu dyanza dyà misambu dyà musuny- . . . ditetulangana's wè!

³⁸ Tudi ne cintu cìmwècìmwè aci mu ntèdeleelu. Kùdì . . . Mvwa mbala bwalu-bulonda bwà Martin Luther, ne yònsò wa ku nwènù balongi bàà maalu-malonda mmumanyè. Mbambè ne kacìvwa cintu cyà kacìyi cyùmvwika to mùvwà Luther mwà kutontolola èkèleeziyà wa Kàtòlikè kàyi ùnyookiibwa to, kàdi bwalu-busokoka bunène, mbwà mùvwàye mwà kukolela dikolesha dyònsò dyà maalu dyàkalondà ditàbuluja dyèndè adi kàdi kutùngunuka ànu ne kushààla ne Dìyi. Ki cishimà ncyòci aci, mùvwà Nzambì mumulamè mukezùke ne mululàme amu.

³⁹ Mpindyewu, ki kulwabo kùdì Samwèlè ewu. Kwambabò ne: “Twènzèlè bu- . . . anyi ùtùtèèkèlè mfù—mfùmù.” Ki Mukalenge kumwambilaYè ne Yèyè ùvwa mubènge mmwènenu awu, ànu mememene cyàkabèngelàYe kaaba aka bulongolodi aci.

⁴⁰ Ànu mwàkabèngàYe aci amu, Yèyè ùdi ùbènga malongolodi. Kèna ùbènga ndongolwelu to, kàdi bulongolodi. Ndongolwelu, bìdi bikèngela twikalè nendè. Kàdi bulongolodi kabyèna bikèngela twikalè naabù to, bwalu bùdi bwèlelangana mikàlu ne: “Twètù tudi *Baakampànda*.” Udi mwena Kilistò anyi? “Mémè ndi Méthodiste.” Udi mwena Kilistò anyi? “Mémè ndi Baptiste.” Aci kaciyèna ne cìdici cyùmvwija citàmbe ngulube mu lupangu to. Aci kaciyèna ne dipetangana naaCì to, nànsha kakesè. Mwena Kilistò!

⁴¹ Mvwa mwelè mwànà wa bakàji kampànda lukonko dilòlòlò adi, pa cibùmbà cyà ku cyambilu ne: “Udi mwena Kilistò anyi?”

Kwambayè ne: “Mòna's, ndi muswè ùmvwè ne, ntu nteemesha kàndeyi bufùku bwònsò.” Byenzè bu ne aci cìvwa ne dipetangana ne bwena Kilistò's!

⁴² Muntu mukwàbo wàkamba ne: “Èè, mémè's ndi mwena Àmèrikè. Bushùwà's!” Èè, aci kaciyènakù ne dipetangana naaCì to, nànsha dikesè. Udi mwena Kilistò bwalu udi wa mu Bukalenge bukwàbò. Ncyà bushùwà. Ne udi—udi mu Bukalenge bukwàbò, bwà kuulu.

⁴³ Mpindyewu, Samwèlè wàkenza cinyi? Cintu ànu cìmwècìmwè cìdi Nzambì mwenzè kaaba aka eci. Samwèlè kukùngwijayè Izàlèèla, kwambayè ne: “Mpindyewu, ntèlèjaayi. Ndi muswè nnùkonke cintu kampànda. Kùkaadikù musangu nànsha wùmwe wùnkaadiku munwàmbile cintu kampànda cìvwa kaciyi cilelèlè anyi?” Yèyè ne: “Mémè—mémè ndi mupròfetà wa Nzambì munkaci mwènù. Anji ngambilaayikù musangu nànsha wùmwe wùnkaadiku munwàmbile cintu kampànda mu Dìna dyà Mukalenge cìtù kaciyi cyenzèke.” Ki cyàkabàmbilà Samwèlè ncyòci aci. Yèyè ne: “Ne Nzambì kàtukù munùdiishè ne munùkùbe ne mwenzè bintu byònsò ebi anyi?”

Yèyè ne: “Nudi nwenza mpèkaatù pa kuteeta kwenza maalu bu matunga makwàbo.”

“Kaa . . .” mwàkambàbo.

⁴⁴ Yèyè ne: “Ndi muswè nnùkonkèku cintu cikwàbò. Kacya nkààdikù munwängàte mfrangà yènu anyi? Kacya nkààdikù munùlòmbe mulàmbù bu kàà pa luse anyi? Anyi nkààdikù munwàmbile cintu kampànda mu Dìna dyà Mukalenge citù kaciyi cyenzèke anyi?”

Bòbò kwamba ne: “To. Kacya kùtukù mwangàte mfrangà yètù to, aci ncilelèlà. Ne kacya kùtukù mutwàmbile cintu kampànda mu Dìna dyà Mukalenge citù kaciyi cyenzèke to.”

Yèyè ne: “Nàнку ngumvwàyi! Nudi nwenza mpèkaatù pa kuteeta kwenza maalu mùdi bakwàbò bònsò.” Kàdi bàvwa bàkèba mfùmù nànsha byà munyi! Nànsha biikàle bìmpè anyi bibì, bàvwa—bàvwa baswè kukumbaja ànu mmwènenenu wabò awu.

⁴⁵ Ncintu cimwècimwè aci cyàkenzà èkèleeziyà mwaba ewu mene ku Efèsò, bàvwa bangàte dilongesha dyà beena Nikàlàwù. Nènku pààkenzàbo nàнку, cyàkabàsàka buludì ku disambakaja pàmwè cimpàngaanù ne bwena Kilistò ne kufilaci bidimu cinunu ne nkàmà yitaanu byà Bikondo byà Midimà. Kàdi Luther pààkabàpàtulàye, bu (cipungu ciibìdi) ba-Luthériens kabààkenza cintu cimwècimwè cyènzèlèbo kale mu Efèsò aci to! Menemene’s.

⁴⁶ Mpindyewu, bu nwènù mwà kumòna, bitèèkedi byà myèndù abi kabìvwa bitèèkiibwe menemene mùshindù ewu to. Bìvwa bìbanga kwìnshì *nùнку* kàdi bìbànda. Èè, cìvwa citàmbe kutùmbùka kule ne mwaba wùvwàYe mwimànyine cìvwa ng’eci lwà kuulu *eku*. Ki bwena Kilistò bùvwà bùfinakajiibwa kakesè kakesè pàvwàbu bwènda bùùmuka kuvwàYe mwimànyine mu mmwènekelu wa nkùrusè apu, mutùdi bafwànyine kuMumòna mu nshapità mwi4; mu mmwènekelu wa nkùrusè mùshindù ewu. Nènku *eci* ncyanza Cyèndè cyà dyàbalùme, *cyàcyà* cìvwa ncyanza Cyèndè cyà dyàbakàji. Mpindyewu, *apa* mene, Yèyè ùvwa ne cyanza Cyèndè citèka pa ewu èkèleeziyà ne pa *wàwa* èkèleeziyà. Ùvwa byònsò bibìdi Alpha ne Omega ne, mu bushùwà bwà bwalu, byònsò bìvwa munkaci mwà bìbìdi abi, maleeta makwàbò ónsò awu. Kàdi Yèyè wàkamba ànu mu mùshindù musungùlùke ne: “Alpha ne Omega.” Ùvwa ne mwanzankóngòlò kumutù Kwèndè, cìvwa ciikàle cipungidi Cyèndè aci.

⁴⁷ Mpindyewu, nwènù baswè kumòna, bukènkè bwà Mpenta, mwaba wàkabangàbu, bwàkafinakajiibwa kakesè kakesè. Bantu aba, Irénée, Polycarpe, bakwàbò bònsò abu bààkatwà citampì ku bujaadiki bwàbò ne mashi àbò, mu mùshindù wà ne ndekeelu wa byònsò cyàkakàma bwena Kilistò ne kubùbweja mu matùkù à matàmbe kwikala à midimà.

48 Mpindyewu tàngilàayi, cikondo cyà kumpàla ku luseke lukwàbò lwà dikokò dinene adi, kùvwa kùlwa ndambù mukese wa Bukênkè, Bukênkè bukwàbò bwàbùngì, pashiishe Bukênkè bukwàbò bwàbùngì. Mònaayi mùdiBu bùbanga kukenkesha cyàkàbìdì, bwènda bùlwa mu ditùkù adi. Nènku mpindyewu ku ndekeelu kwà *eci* cikondo, mbiyànjlila kwamba kaaba aka ne cìvwa mwà kulwa ku *Laòdikìyà*, wa “civùmvù.” Mpindyewu, ncyòci *eci*. Mòna’s, piikalàbi ne *eci* cintu mwab’ewu cyàkabàfikishà ku *eci*, tudì bafwànyine kuswà cyòci aci kwìnshì eku mu Mpenta bwà cinyi?

49 Ne nudi bamanyè ne Bible mmwambè ne: “Kùvwa mwà kwikala nyama wa lwonji.” Ne twètù tudì bamanyè ne mbuupaapà bwà beena Loomò. Ncyà bushùwà menemene. Ne pashiishe bàvwa mwà kwenza cimfwànyì cyà nyama wa lwonji awu. Cimfwànyì ncinyi? Cintu cyenza cifwàngàngane nendè. Ne aci nnsangilu wa maèkèleeziyà, ne Mpenta ùdimù. Nekùlwe cikondo cinwikalà anyi bàà mu bulongolodi kampànda anyi kanùyì mwà kushàalakù balamè ciibi cyènù cikàngula to. Mpindyewu mònaayi aci ní kí ncilelèlà! S’ki bwà cinyi tudì twakulapu ne dinànukila dyònsò. Èyowà’s, mukalenge. Nwènù kanwèna mwà. . . Cyà cishààdile ne ku cyòci aci, nebàteetè bwà kunùkèbela bilumbù bibi be, mu mùshindù wà bàteeta bwà. . . kabààkunùlekelakù nusumba anyi nusumbisha to panwikalà kanùyì ne cimanyinu cyà bulongolodi abu aci. Cidi cibùbwejamù buludì.

50 Ànu menemene bu ditùkù adi, bààkabòòsha, bàvwa. . . Ngàkiimana mwaba awu mu cipalu aci; mèmè kudila mwadi bu mwànà wa mu dibòko pàngàakatàngilà mwaba wùvwa balwanganyi bàà mvità abu mwà kusòmba mu cipalu cyà kale aci. Ne—ne mmòna bintu abi, ne mmanya ne bààbùngì bàà ku bàna bèètù beena Kilistò bààkadiibwa kùdì nyama ya ntambwe ne—ne basùnsula panshi pònsò apu, ne bakàjì ne bàna bakesè ne bikwàbò. Nènku ndi ngeela meeji ne, piikalàbi ne bònsò bààkaya mu buloba mu diitabuuja, ndikù mufwànyine kubeela màyi ku makàsà mpindyewu anyi? To, mukalenge, mwanèètù! Nzambi, enzàku bwà ngiikalè mwimàne bwà Diitabuuja dyàkafidiibwà kùdì bansantu musangu wùmwe cyendèlèlèlè! Cintu cimwècimwè aci, nànsha nciyi munangiibwe. . .

51 Muntu kampànda mmuswè misangu yònsò ànu kwamba ne: “Èè, . . .” Muntu kampànda ùvwa wàmba àbìdì àdì panshi aa. . . Kaa! Mbambi banène bùngì kaayi mu budimi bwà bwambi bàkaadi bambiikile bàmba ne: “Mwanèètù Branham, wèwè kùyì mwimànyike aci to, bulongolodi ne bulongolodi bwònsò’s nebùbenganganè neebè.”

52 “Mòna’s,” mungàakambà, “kùdì Ewu wìkala kàyikù mwà kubèngangana naanyì to, ng’Ewu udi mu Dyulu awu. S’ki Yèyè ùndì mèmè mwindile.” Nwamònu anyi? Mpindyewu, mèmè ntu munangè bantu mu bulongolodi ne bulongolodi bwònsò.

Bushùwà's. Kàdi kacya nkààdikù munwãmbile cintu kampàndà cidì Mukalenge. . . mu Dìná dyà Mukalenge, kacyi cyenzèke anyi? Nwamònu anyi? Byònsò bitu byambiùbwe ne byenjiùbwe mu mùshindù mujaalàme anyi? Kacya nkààdikù munùlòmbe mfrangà bu kàà pa luse anyi? Nàнку shààlaayi pambèlù pàà malongolodi! Shààlaayi badishikàmine mu Kilistò, lekelaayi Nyumà Mwîmpè misangu yònsò ànu ùbwela ne ùpàtuka mu èkèleeziyà.

⁵³ Cintu cìmwèpelè cidì ne bwalu, umùshaayi kunùdì tulumbùlumbù atu. Tusùmbusumbu, ne tunjiyà tukesètukesè tudì tunùnyùngùlùkile bwà bânà bèètù atu, ne bintu byà mùshindù awu, dìnyùkùlùlaayi nubyùmùshè! Kanùlekedikù muji wa bululu nànsha wùmwe wùbwela mu musùkà wènù to. Nwènù benzè nàнку, aci necìnùkunyè bu kamunguji. Cyà bushùwà. Ikalaayi balamè dinanga! Nànsha bantu bakukine munyì, ùbànangè wèwè nànsha bishi. Wèwè kùyì mwà kwenza nàнку to, bidì bikukèngela. . . kùdì. . . kwèna. . . kwèna mutwibwe citampi to, ucidi ne kaaba kadilekèlèle. Pa nàнку lwàku, alùkilà, ne ùtwishèpu citampi bîmpè menemene ne Mashi à Kilistò. Ówò neàkukezùlè ku miji yònsò yà bululu ayi. Èyowà.

⁵⁴ Mpindyewu, nwamònu's, kàdi tudi tuteeta cyàkàbidì. Dibènesha dyà Mpenta dyàkamata lwà ku cidimu cyà 1906, lwà ku cikondo aci. Kùdì mwambi kampànda musòmbe neetù dilòlò edi, mpandanjila wa ku Tibet, umwe wa ku ba- . . . Ncyèna ncyàmba ne mbwalu ùdipù to; ndi ntèkemena ne kî mmwalùkile kumbèlu to. ndi ngeela meeji ne ùcidipù, yèye nguwwa mwà kwakula neetù kakesè ndambù kumpàlà kwa mèmè kulwa. Ne muntu awu mmuvùlùke ntwàdijilu wa Mpenta. Kakùvwakù bulongolodi nànsha bùmwe to, bantu bònsò bàvwa ne bintu bitèekela pàmwe. Kaa, mùshindù mwinè wùdibi bipeepèle bwà kwela cidya cibì mwaba awu mene, ne mùdibi bîmwèka bîmpè bwà mwena mamanya a mu mutù's wè.

⁵⁵ Tàngilàayi, Izalèlèlà kàvwakù mumanyè ne pàvwàbo biimàne ku mwelelu wà màyi aku, bèèla mbilà apu. . . Mpindyewu, wèwè udi wamba ne: "Ewu mùshindù wà ntèdeleelu ncintu cyà cipyacipyà." Mòna's, s'ncyà citàmbe kwikala cyà kale cidiku. Bushùwà's. Nànsha mene kumpàlà kwà dyulu ne buloba kabiyi byenjiùbwe, s' bàvwa bèèla mbilà ne bàtùmbisha Nzambì. Nzambì ngudi mwambè nàнку, wàkakonka Yobò ne: "Ùvwa penyì pàvwà—pàvwà mìtootò yà mu dindà yimba pàmwe, ne bânà bàà Nzambì bèèla mbilà yà disànka." Aci's nkumpàlà kwà dyulu ne buloba kufùkiibwabì.

⁵⁶ Kàdi mpindyewu tàngilàayi Izalèlèlà, ùkaavwa mumòne bishimà. Aci's ki Mpenta wa ku cibangidilu; Izalèlèlà, Mpenta wa ditùkù adi. Mpindyewu bòbò bàkaavwa bapàtula mu Èjiipitu, Nzambì ùvwa mubàbèneshe, mubàpèeshe bimanyinu binènè byà mishindù yònsò ne maalu à kukèma, ne mubàsungilè.

Nènku pààkiimanàbo ku mwelelu wà mâyi awu aku ne bènza disangisha dyà beena Mpenta adi... S'ki cyàkenzàbo! Mpindyewu tèèlejàayi. Mòsà wàkimba mu Nyumà, ne Miliyàmà kwangata dikasa ne kupwekayè lubilu ku mwelelu wà mâyi aku, wènda ùtuuta dikasa, ùja maja mu Nyumà; ki bânà bàà bakàji bàà Izalèèlè kumutwàbo mu nyimà, bènda bàja maja mu Nyumà. Aci cyôci kaciyi disangisha dyà beena Mpenta to, mémè neitukù mwanji kudimòna kacya to. Kabàvwakù bìitabuuja ne—ne buloba bulaya bìvwa mu bidimu makùmi ànaayi kumpàlà kwàbò aku to. Kùvwa ànu mu ntàntà wa kilòmèètà mitwè ku makùmi àsambòmbò ne yìnaayi cyanàànà. Kàdi bìvwa bifwànyìne kubàngata bidimu makùmi ànaayi bwà kwenda kilòmèètà makùmi àsambòmbò ne yìnaayi mbwalu bàvwa basungùle cintu cyà cibi. Bààkasungula bwà kwikala ne mikenji pamutù pàà kulekela Nyumà Mwimpè ùbàlombola, Dikunji dyà Kapyà dyènda diya naabò too ne ku ndekeelu dyènda dibàlombola. Bàvwa baswè kwikalakù ne cintu kampànda cyà bènza bôbò biinè; bàvwa baswè kwikala ne bansaserdòsè kampànda, ne bantu kampànda bàà myànzù mitùmbùke, ne ndambù wa tèlòlji uvwabò mwà kukòkelanganapù, pamutù pàà kuyabò ànu kumpàla cyanàànà ne kulekela Nyumà Mwimpè ùbàlombola. Bàvwa mu Nyumà; Nzambi ùkaavwa mulongòlòle bintu byònsò, kàdi bìvwa bikèngela bwà kwikalabò ne cintu kampànda cyà babwejaMù.

⁵⁷ Ànu mùdibi cyàkàbìdì bwà disopakaja dyà mamiinu. Lekèlaayi ngombe kwèndè kwà tálàlàà. Lekèlaayi kabalù kwàkù kwà tálàlàà. Lekèlaayi byàkudyà kwàbì kwà tálàlàà. Bòbò... Maalu à mamanya mmambè, mu cibejibeji cyà *Reader's Digest*, mu kaabwalu kèndè amu ne, bôbò ànu batùngùnùke ne kusopakaja byàkudyà, ne bantu pààbò bàbìdya... Bu mùdì nzòòlo, bàdi bàngata nzòòlo udi mukwàte ne byà luse awu too ne pàdiye ùshààla kàciyi ne mapwàpwà anyi ne mikòlò to. Ne yèyè mwele diyi, ùdi ùshààla mulààle bu mufwè, miikàle mwà kushààla ne mwoyi ànu cidimu cìmwè cyanàànà. Ne munyìinyi mmutekètàngàne mu mùshindù wà kùyikù mwà kuwùdya to. Ne bantu bàdi bàwùdya, ùdi ùbanyangakaja. Ncyà bushùwà.

⁵⁸ Nudi bamanyè's, disangila dyà mulùmè ne mulùmè ndivulàngane ne byà pa lukàmà bitwè ku makùmi ànaayi mu États-Unis, kupite cidimu cishààla. Ne nudikù bamanyè ne maalu àà mamanya àdi àmba ne bakàji bàkaadi batàmba kudyundila ku makaaya ne bàkèèpela mu cifùka, kàdi balùme bàkèèpela ku makaaya ne bàdyundila mu cifùka anyi? Nudi nudyà dimiinu dinyangakaja, nudi nudyà bintu binyangakaja. Mubidi wèbè wùvwa mwenza bwà kwikalawù wùdya bintu byà mu bufùki. Kàdi cìdìci cyènza ncinyi? Cìdì cìshintulula mene ne musùlù wà cifùkìlu wà balùmè ne bakàji, mu mùshindù wa ne Hollywood, nànsha mene bukalenge bwètù ne byònsò, bikaadi byùle tètè ne bantu banyangakaja. Cìdiye wènza ncinyi? Bàdi

bàditwàdilaci pa bôbò biine ku mucì wàbò sungasunga wà dimanya awu, badishebeya bôbò biine.

⁵⁹ Alùkilaayi ku cibangidilu! Lekèlaayi bufùki kwàbù kwà tàlálàà. Lekèlaayi Nzambì Kwèndè kwà tàlálàà. Lamàayi Èkèleeziyà mu Nyumà Mwimpè; ne ndàayi kule ne bèèpiskòpò ne baapaapà bônsò bàdì ne malongesha à mîshindù yônsò aba. Alùkilaayi mwaba wutùvwà babangile. Alùkilaayi. Bu Yesù mwà kulwa dilòlò edi, wèwè mufwànyine kwamba ne: “Mémè ndi Méthodiste.”

Yèyè ùwva mufwànyine kwamba ne: “Kabìvwà nàнку ku cibangidilu to!”

“Mémè ndi Presbytérien.”

“Kabìvwà nàнку ku cibangidilu to!” Cìvwà ku cibangidilu ncinyi? Dilabula dyà Mpenta dyà dibàtiiza dyà Nyumà Mwimpè. Ki mwàkabangàCi.

⁶⁰ Kàdi, nwamònu’s, bìvwà bìkèngela bwà twètù kucinyangakaja. Kaa, s’mbilenga bilayà. Bushùwà’s. Kaèkèleeziyà kakesè kàdi kiimàne pàapa kàja maja kàka, ne kèèla mbilà; ne mu mùsèèsù mwàmwa, bantu bàbàasa mabwe, bàbèèlulwila, ne bintu byônsò byà mùshindù awu abi. Abi kî mbilenga byà menemene to. “Kàdi mpindyewu tudi ne musambu munènè wà Tùmbishàayi Mfùmù, ne Diitaba dyà Bàpostòlò, ne, kaa, màpòlomè à Docteur mu Ph.D., L.L. ne L.D. misangu yìbìdì, *Kampànda* bu mpaasàtà wetù.” Kàdi kupàtuka kwamba ne: “Aameen,” bu kànà kàà ngombe kiikàle ne tukùlákàji, ne bàtùngunuka mùshindù awu, bintu byônsò byà mùshindù awu abi.

⁶¹ Nwamfwilaayikù luse, ncìvwà—ncìvwà ne meeji a kwamba nàнку to. Nwamfwilaayikù luse, ncìvwà ne meeji a kwamba aci mùshindù awu to. Nwamònu anyi? Ncìvwà ne meeji a kwamba nàнку to. Aci kî ncikùmbàne bwà musadidi wa Nzambì to.

⁶² Kàdi, tàngilàayi, bônsò bwàbò, ndi. . . ncimvwilè pààci ànu mu meeji cyanàànà, nwamònu’s. Kàdi wimana wamba bintu byônsò bishiilèshiiàngàne mùshindù awu, kubyenza kumpàlà kwà. . . nudi bamanyè’s, wamba ne: “Mpindyewu, to, kwèna wamba aci mu mùshindù mujaalàme to. ‘Aameen.’” Mémè ntu munangè disangisha dîmpè dyà cyena Mpenta, dyà kale mudì bukòlè bwà Nzambì bwìcikila, ne nwènu bìikàle ànu nutuuta mikòbolo nwela mbilà nutùmbisha Nzambì, nupìcila mu cikondo cyà dicyònkómoka. Ki mùshindù ngwòwò awu; Nyumà mmukwàte bantu. Kàdi tudi. . . Kùyi mwà kuumvwakù kàbìdì “Amen!” bipeepèlè nunku to, cìdì “Aameen.” Kàdi, ki kutwàya kafika nkwòkò aku, nudi numòna’s. Malongolodi aa mmakàyàbàle, maditàmbishi. . .

⁶³ Mpindyewu bàpo- . . . Kùvwakù cipròfetà pa bwalu abu anyi? Nudi bavùlùke cipròfetà cyà Pòlò makèèlèlè dilòlò awu anyi? “Ndi mumanyè ne paanyimà pàà diya dyànyì, mbwà yà diitu

yà lwonji neyibwelè munkaci mwènù, ne bantu bàà cipidi cyènù sungasunga, cyènù... ànu mu èkèleeziyà wenù mene amu (Èkèleeziyà wa Kàtòlikè wa cyena Loomò, mwikàle ùlwa) nebàjuukè munkaci mwènù ne nebàkokè bayiidi paanyimà pààbò.” Nènku mbwà yà diitu yà Pòlò ayi, tudi tujandula ne, nyàkalwà beena Nikàlàwù abu.

64 Teèlejàayi cyàkàbìdì Nyumà wàkwila ku mupròfetà ne: “Mu matùkù à ndekeelu bikondo byà njiwù nebilwe, bwalu bantu nebiikalè badìangi bòbò biinè, (‘Mèmè’s ndi Docteur *Kampànda*, wèwè kùngambidi bwalu pa Cyòci aci to, mpindyewu. Ndi muswè bwà ùmanyè ne mèmè ndi Presbytérien. Àlèluuyàh!’ Anyi ne: ‘Ndi mwena Mpenta.’).” Ciinè aci cìdì ne dishiilangana kaayi, wèwè kùyi mwena Mpenta ku ngiikàdilù? Dilabula dyàci, nwamònu’s. Èyowà’s, mukalenge. “Mèmè ntu wa mu Assemblées.” “Ntu wa mu Église de Dieu.” Èè aci. . . aci cìdì ne dishiilangana kaayi bwà Nzambi? Bìkèngela wikalè wa mu Bukalenge bwà kuulu kwàka, nwamònu’s. Ncyà bushùwà.

65 Mpindyewu, bu—bu nwènù mwà kumòna, bu. . . bintu byònsò ebi bìdì ànu cìnkùtunkùtù—mùyòmbelè cyà—cyà masandi à mulùme ne mulùme. Mpindyewu, nCyambè ne: “Bàvwà mwà kwikala bapapè mitu, badìbàndishi, banangi bàà bisànkasanka kutàmba kwikala banangi bàà Nzambi.” Kàà, kabèena mwà kuya mu èkèleeziyà mu dyàlumingu dilòlò to pàdiku ndongamu kampànda mwimpè wa ku tèlèviziyò. Kaa, ekèlekèlè! Bàdì misangu yònsò. . . Nànsha mene èkèleeziyà yidi ne tusùmbù twà ndundu, ne madyà à nsupù, ne manàyi à ndundu wa mipànji, ne, “banangi bàà bisànkasanka kutàmba kwikala banangi bàà Nzambi, bashipi bà bipungidi, basòngwedyanganyi, kabàyi ne kudikànda, ne badyombodi bàà aba bàdì bimpè.” Aba bàdyombola bàba, nwamònu’s. Aba bàdyombola bàba, bàbàfùdishà mupùuyà wà munda. Badyombodi bàà aba bàdì bimpè.

66 Kaa, wèwè udi wamba ne: “Abu’s mba-Communistes, mwanèètù.” Kaa, to. To, to.

67 “Bapapè mitù, badìbàndishi, banangi bàà bisànkasanka kutàmba kwikala banangi bàà Nzambi, bashipi bà bipungidi, basòngwedyanganyi, babùle kudikànda, badyombodi bàà aba bàdì bimpè, biikàle ne *cimwènekelu*. . .” Dilabula dyà cyena-màngumba, nwamònu’s. “Biikàle ne *cimwènekelu* cyà difwànà dyà Nzambi, kàdì biikàle bàvila Bukolè bwàdì.”

68 Wèwè uvwakù mufwànyine kwikala cinyi mu ditùkù edi? Nwamònu’s: “Biikàle ne *cimwènekelu* cyà difwànà dyà Nzambi.” Mwikàle uya mu èkèleeziyà ànu ne kaneemu kakolè bwà ntèndeelè ne mwèbè mwònsò mu dyàlumingu, kàdì uvwàla tùpùtulù mu dyàlumingu mu mapingaja, ukòsa mashindà mu bulà ne unwà maalà à Oertel 92 pambèlu apu. Ne mpaasàta

ùpàtuka pambèlu ùkanwà mucì wà mfwankà wàlukila, nudi bamanyè's. "Biikàle ne cimwènekeli cyà difwànà dyà Nzambi!"

⁶⁹ "Èè, mpaasàtà, bàdi ne èkèleeziyà kuntu kwàka, bàngambila ne inàbànza kampànda mmwondòpiibwe ditùkù adi ku kàn-..."

"Hmm. Hmm. Macimbu's wè! Matùkù a bishimà's àkaadi mamanè kupita."

⁷⁰ "Èè, nudi bamanyè mùdi bwalu anyi? Mwva—mwva—mwva muyè ku kaèkèleeziyà kakesè kampànda dilòlò adi, kaacitanda kakesè kàka lwà mu disangu mwàmwa, ne kùvwa muntu mujuukè, wàkula cintu kampànda, ùkukumin-..."

"Kaa, munanga wanyi, kwikadikù mukalamàte ku kàa mùshindù wàwa to. Yàya's mbwa mipaale's. Ekèlekèle! Kwikadikù ukajimija díbà ne byà nàka to. Bàba mbansantu babùnguluki bàà mu malaba. Kùdìdingikù..."

⁷¹ "Biikàle ne cimwènekeli cyà difwànà dyà Nzambi kàdi biikàle bàvila bukolè bwàdi, epùkà bàà nàнку awu abu. Bwalu aba mbàà mùshindù wà bàdi bàya ku nzùbu ne ku nzùbu ne bàlombola bakàji bakùtākàne bàdi bapàmbula kùdi nkùkà yà mìshindù yònsò, kabàiyikù mwà kuyiila anyi kabàiyikù mwà kufika ku dimanya dyà Bulelèlè to." Aci ncyà bushùwà wemene. Ki bwalu abu's, kasùmbù kàà bainàbànza, aka kasùmbù, kàka nàka. Èkèleeziyà mukwàte ne byà luse ukàadi ne tusùmbù bùngì cyanàànà mu mùshindù wà kabàciyikù nànsha mwà kuyiisha kàbìdì Èvànjeeliyò to. Mpaasàtà ùdi mwà kwikala ànu ne tusunsa makùmi àbìdì, ne díbà adi bikèngela àkulè pa cintu kampànda cikwàbò. Nwamònu anyi? Yèyè kàyi mwenzè nàнку to, kasùmbù kàà balami nekàtwilanganè nendè. Èyowà's, mukalenge.

⁷² Kaa, mwanèètù, bikèngela mpaasàtà mwìmpè ènzè cinyi leelù ewu? Ènzè yèyè ànu ne mwèndè mwònsò bwà kajuukayè ne kukòsa matàmbà aya kwònsò kudiwù maswè aku, ne kulekela bipàtù bikamacila kwònsò kwàkamacilàbi aku; ne kubiimansha ànu kwàka. Kwàjikì. Èyowà's, mukalenge. Ncyà bushùwà. Kwè—kwèdikù muntu nànsha umwe paanyimà to, yiishà wèwè ànu Dìyi ne shààla ànu naaDì, tungunukà ànu ne kusùminyìnàpù. Bòbò bakwelè mu bùlokò, ùDiyiishe mu bùlokò amu. Bòbò bakwelè nì mpenyi pakwàbò, yiishà kwònsò kùyaaya aku; tungunukà wèwè ànu ne kuya, wenda uyiisha. Ncyà bushùwà. Mpindyewu, ki cidì cyenzèke ncyòci aci. Nwamònu's, bòbò bàdi bacìbwikidija mukana.

⁷³ Mpindyewu tukàadi tufika ku—ku Cikondo cyà Seemùnà. Mvensà wa 8:

...kùdi mwanjèlo wa èkèleeziyà wa Seemùnà fùnda ne: Ebi mbintu bìdì wa kumpàla ne wa ndekeelu wàmba, ewu wwa mufwè, ne udi ne mwoyi;

⁷⁴ Ndi muswè bwà numònè ne musangu wónsò wùdiYe ùDiteeja kùdi cikondo cyà èkèleeziyà, Yèyè ùdi ùleeja patòoke cintu kampànda cyà Bunzambì Bwèndè. Ki cintu cyà kumpàlà cidìYe ùteeta bwà kumanyisha èkèleeziyà, ne, ki Bunzambì Bwèndè. Yèyè ùdi Nzambì! Nudi numòna cilumbù cinène mwaba ewu civwà Irénée ne bakwàbò biikàle bàkòkelangana aci anyi? Bàvwa bàteeta kwamba ne Nzambì ùdi mu bibwàshìbwàshì bisàtù, ne n’Nzambì mu bapersonà bàsàtù, ne Nzambì ùdi mu *cikampànda*. Yèyè ne: “Cintu bu nàнку kacitukù to! Mmyânzù yà Kampànda umwèpelè, ne mwinè awu n’Nzambì wa Bukolè bwónsò.” Ncyà bushùwà. Pa nàнку kwèna . . . bôbò bàtu misangu yónsò ànu ne cyôci aci. Nènku Nzambì mwaba ewu ku cibangidilu nyewù ùDitèejila ku bùmwe bwà ku Bunzambì Bwèndè—Bwèndè. Nudi numòna ne Ùdi ùDileeja, dyàmbedi mwaba ewu ne: “Ndi Ewu uvwaku, udiku, ne wâlwa awu. Ne Mémè ndi wa Bukolè bwónsò.” Ki Yèyè ewu ùbanga ne Cikondo cyà Seemùnà mpindyewu.

⁷⁵ Mpindyewu Mutèelejaayi: “Ndi . . .”

. . . *kùdi mwanjèlo wa èkèleeziyà wa Seemùnà* (Ne tudi twitàbuuja ne awu ny’Irénée.) *fùnda ne: Ebi mbintu bìdì wa kumpàlà ne wa ndekeelu wàmba, . . .*

Nwamònu anyi? MuDileeje ne: “Ndi Nzambì, mpindyewu, wa cikondo cyà èkèleeziyà eci. Ncyèna muswè byà nzambì yinaayi anyi yitaanu mishìllàngàne mwab’ewu to. Mémè—Mémè ki Nzambì. Nwamònu’s, ki mùdibi nàнку.”

. . . *uwwa mufwè, kàdi mwikàle ne mwoyi; (Amen!)*

⁷⁶ Mpindyewu, aci ndi—ndiditèèja. Mpindyewu—mpindyewu *Seemùnà* mbwena kwamba ne “bululu,” ne cidì cifùmina ku mwakù muulà—muulà. Nènku èkèleeziyà wa—wa kumpàlà—èkèleeziyà wa kumpàlà, ne . . . ùvwa mujimìje dinanga dyèndè dyà kumpàlà, èkèleeziyà wa Efèsò. Ne èkèleeziyà ewu ùvwa mubangè kupeta “muji wa bululu” mujuukè munda mwàbò bwalu èkèleeziyà ewu, èkèleeziyà wa munène, citùpà cinène (ciibùngì cyà kùdibo, misangu yónsò) ùvwa ùlwishangana ne Nyumà Mwimpè uvwa ukòokesha mu èkèleeziyà awu, nènku bàvwa bàswa kukòokesha, bôbò biinè. Bàvwa baswè kujuula bwakwidi kampànda, basvwè kwenza maalu mùvwà bantu bàà mu Dipungila Dikùlukulu bènza amu. Bàvwa bàkèba baakwidi. Ki bôbò . . . Pìikalàbi ne nzambì yà cimpàngaanù, kale wàwa, kùvwàbò bakùdimwine mucima aku, bàvwa ne baakwidi ne bikwàbò byà . . . byà Jupiter, ne baakwidi bàà Venus, ne bikwàbò; bôbò—bôbò—bôbò mbaswè kubwejamu cintu cimwècimwè aci bwà kutèeka bantu *aba*. Nwamònu’s, cintu cyónsò mu kaabujimà mbumpàngaanu ànu kwìnè kwónsò aku. Bampàngaanù bónsò bàtu ne baakwidi abu ne bintu byà mùshindù awu. Kàdi—kadi Èkèleeziyà wa Nzambì udi ne mwoyi, mmwenyi kùdibi. Kilistò ki wetù Mwakwidi, Mwakwidi wetù Munène. Twètù tudi kàbìdi ne Mwakwidi Munène, mèèsà kutùdi tudyà.

⁷⁷ Mpindyewu, èkèleeziyà ewu ùkaavwa mubangè kutòlwesha “muji wà bululu.” Bwà cinyi? Ûvwa ne bululu bwà kulwisha aba bàdì baswè kutungunuka ne Nyumà Mwîmpè. Dinanga dikaavwa dijimine, ne bàvwa bàteeta kudishintakaja ku twitabàayi ne mângumba, bàseesuka ku bulombodi bwà Nyumà Mwîmpè. Elàayiibi meeji ku bwalu abu! Ki bwà cinyi bu—bu—bululu bìvwa munda mwàbò. Èyo.

⁷⁸ Mpindyewu, èkèleeziyà wa kumpàla, eci...bululu bwàkabanga kudifindamù. Èkèleeziyà mwibìdì, bukwàbù ndambù. Nènku, ndekeelu wa byònsò, bwàkadifindamù bwalu bàvwa “bènza èkèleeziyà mutàmbe bwîmpè”; bàvwa bèèla meeji ne ki cìvwàbò bènza. Ànu mwaba ewu bàvwa ne cintu kampàndà cyà kuneemekiiibwa, beena Loomò bàà banènè bàvwa mwà kubwelamù abu’s. Bwà cinyi? Bàvwa ne paapà, bàvwa ne—bàvwa ne bantu banène, ne baakàrdinalè, ne bikwàbò. Bàvwa bàvwàla bilenga. Bààkaya kule ku mutooyi wònsò ne byònsò bìvwàbò naabi; bapùwe bikolè. Bìleeja ne bàvwa bàpunga ne lufù. Uh-huh. Uh-huh. Bàvwa bàpunga ne lufù. Ki bòbò kupeta banène bàà luumu ne kwenzabò cisumbù citàmbe bwîmpè. Cintu cyà kumpàla mwaba ewu, bàvwa ne cintu cyònsò mu kaabujimà mu dîngumba dinène dyà cyena-ntèndeleeleu, èkèleeziyà wa Loomò wa Buloba bujimà awu, Èkèleeziyà wa Kàtòlikè wa cyena-Loomò mu Cikondo cyà Mìdimà. Èè, dìbà adi, bàvwa ne bantu bàà myànzu mitumbùke, ne bàvwa ne cipidì.

⁷⁹ Kaa, bìvwa bilenga byà dikèma kutàmba mùvwàbò kale wàwa bìmanyina mu mùsèèsù, “ne bikèngela bènda bavwàla bisèbà byà mikòòkò bu bisèbà byà mbùji, ne banyènga bintu byònsò, ne bàbàkosolola ne mwelè wà mabaya, ne—ne basekiibwe, ne bàbèèlulwila,” ne mwàkambà Pòlò mu Ebèlù nshapità wa 11.

⁸⁰ Mòna’s, èkèleeziyà munène, mwalàbàle, wa bantu bavwàle mìzàbì milenga, ne bìvungà bilenga ewu, ne—ne bintu bikwàbò byònsò bidìbò bàvwàla mùshindù awu ebi. Bushùwà’s, bìvwa bimwèka byà kaneemu ne: “Taatu, Révérend, Docteur, Taatu *Kampànda*.” Kàa, ekèlekèle! Bàvwa bafwànyine kuleeja bintu bya “tuyaayi tukamona,” mwaba awu.

⁸¹ Kàdi, nudi numòna’s, cìvwa ncintu cyà cisopakaja. Cisopakaja! Nwamònu’s, kacìvwa ne Mwoyi nànsha mukèsè munda mwàcì to. Ne kabèèna mwà kwalukila cyàkàbìdì to, ki bwà cinyi kabèèna bàjuukakù to. Ditàbuluja dyà ba-Luthériens kaditukù dijuukè cyàkàbìdì to. Ditàbuluja dyà Wesley kaditukù dijuukè cyàkàbìdì to. Ditàbuluja dyà ba-Nazaréens kaditukù dijuukè cyàkàbìdì to. Nànsha ditàbuluja dyà beena Mpenta kadyàkujuukakù cyàkàbìdì to. Bwà cinyi? Bwalu nudi badishipè. Nudi nudisopakaja ne maalu à pa buloba, ne mmwènenu yà beena Nikàlàwù, kanùyikù nulekela Nyumà Mwîmpè wàngata njila Wendè to. Ncyà bushùwà. Nudi nusopakaja èkèleeziyà,

ne kèna mwà kulelangana yèyè mwinè cyàkàbìdì to. Panùdi nusopakaja, nudi nupeta ba-Méthodistes bakwàbò bààbùngì; ba-Baptistes badisopakaja, bàpeta bakwàbò ba-Baptistes bààbùngì; Beena Kàtòlikè bàdisopakaja, bàpeta bakwàbò beena Kàtòlikè bààbùngì; nudi nupeta cintu cimwècimwè ànu cinùdì nuumusha cizubu aci. Kàdì lekèlaayi nnwàmbilèku cintu kampànda; pàdì Nyumà Mwímpè wàlukila, Ùdì ùtwàla dilediibwa *dipyadipyà* ne Mwoyi *mupyamùpyà*; dikùdimuna dyà mucimà. Dibàtiiza dyà Nyumà; didi dyàluja cyàkàbìdì Èkèleeziyà ku yèyè mwinè, dyàluja cyàkàbìdì Mwoyi munda mwèndè amu.

⁸² Ditalà disopakaja kadyèna ne mwoyi munda mwàdì to. Mwoyi mwinè wùdiku awu, wùdì ànu munyangakaja. Mpindyewu, tudi twangata aci mu Cikondo cyà Mìdimà aci ne: “Kakesè kaùdì naakù aku, shààla mukàkwàte,” mwàkambàYe. Bàkaavwa bakàkàme kwònsò. Mpindyewu, kàdì kakààkuvulanganakù cyàkàbìdì to. Mpindyewu, kùdì. . .

⁸³ Kàdì Mubidi wà Yesù Kilistò kí—kí mbulongolodi kampànda nànsha. Mubidi wà Yesù Kilistò m’Mubidi musokòme, m’Mubidi wà. . .mu Bukalenge bùdì Bukalenge bwà nyumà bùdì butèèkùibwe pa buloba kùdì Yesù Kilistò mwikàle Mfùmù wa bwòbù Bukalenge ebu, Mwakwidi Munène bwà kulàmbula milàmbù bwà beena lwendu bàà mu Bukalenge ebu. Yèyè m’Mupròfeta (Diyi adi) udi uyiisha Bulelèlè ne utwàla Bukènkè bwà Nzambì mu Bukalenge ebu; ne Yèyè ùdì byònsò Mupròfeta, Mwakwidi, ne Mfùmù, mu bwinè Bukalenge ebu. Kàdì tudi tubwela mu Bukalenge ebu bìshi? ku dngumba anyi? ku mukànda mufùndilangana anyi? ku dilabulangana dyà ku cyanza anyi? Kàdì “ku Nyumà umwe nkutùdì bònsò babàtiijìbwe mu Mubidi wùmwe” wùdì Mubidi musokòme wà Yesù Kilistò, ne twètù tudi babàtiijìbwemù, kabiyi ku màyi to, kabiyi ku dimyaminyiibwa dyà màyi to, kabiyi ku dipongolodiibwa dyà màyi to, kakùyì ku dibàtiiza dyà màyi dyà mùshindù kanà wònsò to, kàdì “ku Nyumà umwe, Nyumà Mwímpè, nkutùdì bònsò babàtiijìbwe mu Mubidi wùmwe,” Kolintò wa Kumpàla 12. Èyo, tudi babàtiijìbwe mu Mubidi ewu ku Nyumà umwe, Nyumà Mwímpè, dîbà adi katwèna bàà ku cintu nànsha cimwè to pa kuumusha Kilistò. Wèwè udi wa Kilistò. M’Bukalenge busokòme bwà Nzambì bùdì bulongolola, bwà twètù kubwelaMù ku dibàtiiza dyà Nyumà Mwímpè. Mémè ndi munangè Aci! Hmm!

Kùdì bantu pàmwè ne myaba yònsò,
 Beena myoyi yìlákuka yònsò kapyà
 Ne Kapyà kàakapòna dyà Mpenta aku,
 Kààkabàkezulà ne kubàtòòkeshà aku;
 Kaa, nkaKàlákuka mpindyewu mu mwoyi
 wànyi,
 Kaa, butùmbi kùdì Dìna Dyèndè!

Ndi ne disànka be mûndi mwà kwamba ne ndi umwe wabò.

Ndi umwe wabò, ndi umwe wabò,
Ndi ne disànka be mûndi mwà kwamba ne ndi umwe wabò; (Àlèluuyàh!)
Umwe wabò, ndi umwe wabò,
Mpindyewu ndi ne disànka be mûndi mwà kwamba ne ndi umwe wabò.

Nànsha mùdì bantu aba kabàyi mwà kwikala balonge, (ne màpòlomè à D.D.D. Ph.D. Nwamònu's.) . . . kabàyi mwà mwà kwikala balonge,
Anyi kuditàmbisha bwà luumù lwà pa buloba, Mbapetè bônso Mpenta wabò,
Babàtìjìibwe mu Dìna dyà Yesù;
Ne bàdi bàmbilangana mpindyewu, ne kule ne kumpengà ne,
Bukolè Bwèndè bùcìdi ànu bùmwèbùmwè abu,
Ndi ne disànka be mûndi mwà kwamba ne ndi umwe wabò.

Wèwè kwèna ne disànka anyi? Èyowà's, mukalenge. Ànu umwe wabò. Kwàjìkì.

⁸⁴ Ndi mvùluka pàmvwà mpicila mu Memphis, inàbànzà mukesè, mukùlumpè wa bafìke awu ne mutù wèndè mweyemeja mwaba awu. Yèyè kwamba ne: “Wetwàwu mu dindà emu, mpaasàtà.”

Mémè ne: “Wàmanyi bìshi ne ndi mpaasàtà?”

Yèyè ne: “Mukalenge ngudi mungambìle ne: ‘Mpaasàtà Wèndè nya’ wènda ùpweka ne mùsèèsù, mwàsè cifulu cifiikùlùke, mwambùle mushèètè wà bilàmbà.” Yèyè ne: “Mémè kumanya ne ùvwa ngwèwè pàngààkumònu ulwa apu.” Nwamònu anyi? Kaa, yèyè's ùvwa umwe wabò. Ncyà bushùwà! Kaa, mùshindù mwinè wùdì Nzambì mwîmpè's wè!

⁸⁵ Mpindyewu ndi ngeela meeji ne cintu kampànda... [Mwanèètù Branham ùdi ùbala kabèji kàdìbo bamupèèsha—Muf.] “Mwànà mukesè wa bakàji unùvwà basambidile awu—awu, mu dyàlumingu dilòòlò, wa mu Bedford awu, ùdi ne cyà kwikala mufùme ku difwà. Eci kacýèna mwà. . . Bu nwènù mwà kuswà sambilaayikù.” Mwànà mukesè wa bakàji utùvwà. . . uvwabò basambidile mwab'ewu mu dyàlumingu dilòòlò, wa ku Bedford awu, “wáfumu—wáfumu ku difwà,” mùdìbo bambè. Twènzàayi disambila:

⁸⁶ Mukalenge Yesù, ndi ndòmba mu mùshindù kampànda anyi kansanga, Mukalenge, masambila ètù àfikèku bwà mwànà awu. Nyewù tuKulambùla kaacintu kakesè aku, Nzambì Taatù wetù. Ne tudì twelakù meeji bwà bantu bàvwà kaaba aka bàsambila ne bàlòmba disambila bwà mwànà mukesè wa bakàji awu.

Éyì Nzambì Taatù, ndi ndòmba bwà—bwà ne mulubù ewu kawikadikù nànkù to, Taatù; katwèna bamanyè to, kàdi ndi ndòmba bwà Wikalèku ne luse ne ùfilèku dikàndà ne ùlekelèku mwànà mukesè ewu àjuukè ne ikalè ne mwoyi bwà butùmbì bwà Nzambì. Mu Dìna dyà Yesù Kilistò mmutùdi tulòmba nùnkù. Amen. Mukalenge Yesù àsakidilèku mabènesha Èndè.

⁸⁷ Mpindyewu, èkèleeziyà kampànda. Mpindyewu, dìnà dyà èkèleeziyà ndiswikàkàne ne ngiikàdilù wendè. Nudi bavùlùke ne *Seemùnà* mbwena kwamba ne “cyà bululu anyi”? Nènku nudi numòna yònsò wa èkèleeziyà ayi mpindyewu, dìnà dyà èkèleeziyà ndìdi ne dipetangana ne ngiikàdilù wa èkèleeziyà awu. Ndi mufwànyine kwambakù cintu kampànda mwab’ewu; kàdi mbìmpè bwà ncyàmbi to, bwalu nudi bafwànyine kungumvwa bibi. Nwamònu anyi?

⁸⁸ Dìnà dyèbè adi, dìdi dyàmba bwalu. Udi mufwànyine kupanga kucimanya, kàdi dìdi dyàmba bwalu. Kaa, èyowà’s. Wèwè udi wamba mpindyewu ne: “Abi’s ndilonga dyà nombà’s.” To, kí ndyòdi to. Pààkalediibwà Yakòbò bàakamwinyika ne *Yakòbò* cìvwa cyumvwija ne “munyèngyanganyi wa myaba;” kàdi pààkalwanganàye mvità ne Mwanjèlo awu, Nzambì wàkamushintulula dìnà dyèndè kulwadi *Izàlèlèlè*, “mwànà wa mfùmù.” Ncyà bushùwà anyi? Shawùlà ùvwa “Shawùlà wa ku Taashìshì,” muntu wa lwonji; kàdi, pààkalwàye kùdi Yesù, wàkabiikidiibwa ne “Pòlò.” Dìnà dyà Simonà divwa “Simonà”; kàdi pààkalwàye kùdi Yesù, wàkabiikidiibwa ne Peetèlò, “kaadibwe kakesè.” Kaa, èyowà’s, mukalenge. Kùdi . . . Dìnà dyèbè adi ndiswikakaja ku cyùdi . . . Dìdi ne didìleeja kampànda pa ngiikàdilù webè.

⁸⁹ Ne èkèleeziyà ewu uvwa ùbiikidiibwa ne n’Seemùnà bwalu ùvwa ùpunga ne lufù. *Seemùnà* mbwena kwamba ne “bululu.” Mu ngaakwilù mukwàbò, muji wà bululu wùvwa wùpàtuka mwikàle wùmupàtakaja mweyelu, yèyè ùvwa mu njiila wa kupàtuka mutàngile ku muulà. Aci ki citùbo bàlaaba naaci mibidi maanyi, muulà, nwamònu’s. Cìvwa mmuulà, musenga wà kamonya, bu bwanga bwà màfutà. Bātu bàkwàta mudimu ne muulà bwà—bwà kulaaba bitàlù maanyi paanyimà pàà bamanè kubyèla bwanga bwà dibènga kubola, ne bikwàbò. Muswikàkàne ne lufù, ne èkèleeziyà awu ùvwa ùpunga ne lufù.

⁹⁰ Nènku, kaa, kanwènaayikù mwà kumòna, leelù ewu, balundà bàanyi, nkwaka munène wa beena Mpenta uvwakù cyà bushùwà ne Mwoyi kùkaadi ndambù wa bidimu awu, kanwènaayikù mwà kumòna ne ùkaadi munkaci mwà kulaabiibwa mpindyewu ne muulà anyi? Nwamònu anyi? Bwanga bwà màfutà bùmwebùmwe bùvwa mu èkèleeziyà ewu mbupwekè kwìnshì eku bwikàle bùlaaba udi kwìnshì eku ewu; munkaci mwà kujìma bwalu bàdi munkaci mwà kwalukila ku mikùsù yà ntèndeelèlu, ne bùùmusha mùzàbi wàbò mutòòke awu, bansantu’s. Bantu bàà bakesè bààkiimanà

kwàka, ne Nyumà Mwímpè mushùwashùwàlè abu, bàakaakula mu myakulu, ne bàakamwènesha Nzambi. Nènku, mwanètù, bòbò bàvwa ne meeji matòòke ne, “ne mwàbò mwònsò.” Bàvwa—bàvwa kakùyì mpatà to bashùwashùwàlè, mu mùshindù wà wèwè mufwànyine kubèeyemena mwaba kanà wònsò. Patùdì twakulangana apa kwèna umanya cyà dyyemena ne wa kweyemena mwinè to. Nwamònu anyi? Kùdì cintu kampànda cyenzèke. Cintu kampànda ncyenzèke. Ncinyi aci? Bàdì munkaci mwà kulaabiibwa muulà, wà bululu. Dijuuka’s. Umwe. . .

⁹¹ Cìvwa cibùkèbe ncinyi? Umwe ùbwela, kùvwa è—èkèleeziyà ùbìikidiibwa, wa kumpàla awu, cìvwa Nsangilu wa Bònsò. Pashìishe kucibìikilabò ne Assemblées de Dieu. Mu Assemblées de Dieu kupàtukamù Église de Dieu. Mu Église de Dieu, pashìishe kubangabo kutàngila dyàmwàmwa, bàmba ne: “Nwènù nudi Assemblées.” Mukwàbò ne: “Nwènù nudi Église de Dieu.” Pashìishe mu aci kupàtukamù Église Pentecôtiste de Dieu Unie, mu cilumbù cyà bàkòkangana’s. Ki pashìishe, katancì aka, pamutù pàà kwitaba Bukènkè ne kwendelaMu, mòna’s, bàkaavwa badyènzè bulongolodi mu mùshindù wà kabàyikù bafwànyine kwitaba Bukènkè to.

⁹² Mpindyewu, pàakatwàdiibwà dibàtiiza dyà—dyà mu Dìna dyà “Yesù Kilistò” pamutù pàà “Taatu, Mwàna, ne Nyumà Mwímpè” kùdì beena Assemblées de Dieu, bòbò bàkaavwa bamanè kwela lwongò mu mùshindù wà kabàyikù mwà kucishintulula to. Kàdì mbamanyè ne Cidi Bulelèlè! Mèmè ndi ngeela yònsò wa kùdibo kadyòmbò bwà àndeejèku ne Cyòci aci kacýena cilelèlè ku Bible. Kakùyì mpatà to m’Bulelèlè. Kàdì cidibo mwà kwenza ncinyi? Kabèena mwà kucyènzakù to. Nwamònu’s, mbafwànyine kutùpa ku twitabàayi yàbò ayi, kabèena mwà kucyènzakù to.

⁹³ Pashìishe ba-Unitaires bàakenza cinyi? Pamutù pàà kuCìitababò ne kutùngunukabò, kulwabò buumàkàne ne: “Nzambi àbeneshiibwè kashidi! Twètù mbàdì ne Bukènkè, kàdì nwènù kanwèna naabù to. Twètù mbàdì. . .” Cyàkenzàbo ncinyi? Bàkacìvwija bulongolodi. Kwèna mwà kuvwija Nzambi bulongolodi to. Nzambi kàtu mene ne mmwènekèlu wa kwìsùkwìsù to, mùdì Bible mwambè. To, cintu nànsha cimwè cyà kwìsùkwìsù bwà Nzambi kacituku to.

⁹⁴ Mpindyewu, pashìishe beena Assemblées kuteetabò bwà kuMuvwija bulongolodi ne kubàvwija. . .wabò. . .wabò bòbò ki—ki—ki Èkèleeziyà mulèlèlè. Ki pashìishe ba-Unitaires kulwabò, kuteetabò bwà kuvwija wabò awu bulongolodi, ne “bàvwa ne Bukènkè butàmbidìle.” Ki kwenzabò cinyi? Bòbò kubùjìma ku mushindu wàbò sungasunga wà budisù, wà bululu ùvwabo bènza maalu. Pamutù pàà kubwàbanyinangana butwè mukèlè ne kalolo, kuteetabò bwà kukòsa bwobùmwe ne mukwàbò awu, bwà kabìikadi nendè bwalu to. Nènku ki cyàkanyangà maalu’s. Bùvwa butangàlàke, dìbà adi.

Katanci aka anyi, mukwàbò kujuukayè, bôbò kupeta *cikampànda*, ki mpindyewu kutapulukabò. Umwe kwambayè ne: “Úlwalwa pa kabalù katòòke.” Mukwàbò ne: “Úlwalwa pa ditutu ditòòke. Nzambi àbeneshiibwè, mèmè nêmbangilèpu bwànyì bulongolodi.” Nwamònu mùdìbo bàcyènza amu anyi? Kutangalajaci muulà—muulà’s. Cyòci kwenza cinyi? Kushipaci buuwetù.

⁹⁵ Bantu bakàji bààbùngì, bantu balùme, dilòòlò edi, mu Assemblées de Dieu, mbaswè bwà kulwa kubàtijiibwa mu Dìna dyà Yesù Kilistò, bamanyè ne Ki Bulelèlà bwà Nzambi. Mbatfwanyine kwipaciibwa bu bôbò mwà kucyènza.

⁹⁶ Ne ba-Unitaires bààbùngì bàà . . . Mpindyewu, mèmè ncìtu Unitaire to. Ncìtu ngiitabuuja mu “bùmwè” mùdìbo bôbò biitabuuja amu to. Ncìtu ngiitabuuja *Yesù* mùdìbo bôbò baswè kwamba ne: “*Yesu*” amu to; kùdi baaYesù bùngì cyanààna. M’*Mukalenge Yesù Kilistò*. Ncyà bushùwà. Mpindyewu, ne mèmè ncyèna . . . Ndi ngiitabuuja aci bishiilàngàne ne cidìbo bôbò biitabuuja aci kule. Bôbò bàdi bàbàtiiza mu Dìna dyà Yesù, mu Dìna dyà Yesù bwà difùkuludiibwa, ne “Kubàtijiibwa (difùkuludiibwa) kùdi kùkutwàdila Kilistò bwà dibàtiiza dyèbè dyà mu màyi adi.” Mèmè ncyèna ngiitabuuja aci to. Mèmè ndi ngiitabuuja ne difùkuludiibwa didi dilwa ku Mashì à Yesù Kilistò ku Nyumà Mwimpè. Ncyà bushùwà. Dibàtiiza didi ànu cyenzi cyà pambèlu bwà mudimu wà munda wà difùkuludiibwa wùdi mwenjiibwe. Nwamònu anyi? Pa nànu, mèmè ncyèna ngiitaba aci to. Abi bìdi ànu bìmpè’s, kàdi bônso mbàna bèètù.

⁹⁷ Pàncìvwà mbangilakù bu muyiishi wa ba-Baptistes, bàvwa bàlwa kùndi bàmba ne: “Mwanèètù Branham, lwàku kùneeku, twètù—twètù—twètù mbàdi naaCì ne tudi balwè naaCì apa.”

⁹⁸ Mèmè ne: “Kì ng’ewu anyi ewu wa kunùdi to, mèmè ndi mwimàne pankaci pàà tusùmbù túbìdi atu mene ngamba ne: “Tudi bàna bàà muntu!”” Nànsha ciikàle cinyi, nànsha bu muntu mwà kubènga, aci kacyèna ne cidici cishintulula to nànsha kakesè bwànyì mèmè, yèyè ùdi ànu mwanèètù.

⁹⁹ Ndi ne mwanèètù utu munangè màmpà meela pomè; mèmè ntu munangè ngamba kufwà màmpà meela tumpùlùmànjé, kàdi ncyàkushipa nendè malanda to. Yèyè ùdi mwà kudyà dyàmpà dyèndè dyela pomè adi ne mèmè kudyà dyàmpà dyànyì dyela tumpùlùmànjé adi. Ne mèmè ngèèla *citàpitàpi cyà mayi* pa dyànyì apu, yèyè kàyi muswè abi to, mònà’s, yèyè’s ùdi ànu mwà kudyàngata. Nudi bamanyè ne . . . Ncinyi aci? Bintu bivundula bìdìbo bèèlapù abi, nudi bamanyè’s, “busùkusuku buvundula’s.” Mèmè ntu munangè aci. Nkàadi ngenda nkùlakaja bikolè mpindyewu bwà kubìdya, kàdi bìdi . . . Kàdi ndi—ndi—ndi . . . Kì bintù mèmè munangè’s. Yèyè kàyi mubinangè to, kabyèna

bikèngela bwà àbìdyè to. Abi's bidi ànu bîmpè, mèmè nëndye dyànyì adi. Kàdi yèyè's ùdi ànu mwanèètù! Ncyà bushùwà.

¹⁰⁰ Ne pa nàнку mèmè—mèmè ntu munangè aci, ntu munangè bwobùmwè. Kàdi patùdi twelelangana mikàlù mùshindù ewu, twamba ne: “To, edi ndingumba *dyètù* twètù,” ne katùyi baswè kwolola cyanza bwà kulabulangana ku cyanza ne mukwàbo awu, kàdi twamba ne: “Nzambi àbèneshiibwe, mwanèètù!” Ekèlekèlè! Apu's ki paùdi ubiikila ne ki bwobùmwè. Wèwè kùyi wenza nàнку to, udi upeta muji wà bululu awu ànu mwàkàwùpetà beena Seemùnà abu kale wàwa amu, ne udi ukakèba cintu ànu cyòci cimwècimwè aci. Èyo, nàнку dìnà dyàbò divwa “bululu.”

¹⁰¹ Beena Nikàlàwù bàvwa batùngùnùke ànu ne kubàpàtakaja mweyelu too ne mu Bikondo byà Mìdimà. Cikondo cyà Luther ncyàkapatulà citùpà cyà kumpàlà cyà ngàsà, ndambù wa Bukènkè kubangayè kukenka. Pashiishe kulwakù paanyimà pàà aci, kulwakù John Wesley ne dijidiibwa, kutàmbabù kukenkesha ndambù. Ki pashiishe kulwakù dibàtiiza dyà Nyumà Mwîmpè ne beena Mpenta, cyàluja cyàkàbìdi diitabuuja dyà baataatù. Kàdi kabàvwa mwà kucilama mùshindù awu to, nùнку bìvwa bikèngela bwà bàcìvwijè bulongolodi, ki pashiishe kubangabò cyàkàbìdi kwalukila mu cyena Nikàlàwù. Ànu menemene cìdi Bible mwambè ne nebènzè aci.

¹⁰² Mpindyewu, bikèngela ntàngilè kaaba aka bwà cyanàànà nèncibwejè. . .nèngàngatè dìbà dipitèpite bungi. Tùyaayi ku mvensà mwi2, anyi. . .aci ncifwànyine kwikala mvensà wa 8, wa 9. Èyo, mpindyewu dikèngeshiibwa, mvensà wa 9:

Ndi mumanyè byenzedi byèbè, makèngeshiibwa èbè, . . .bupèlè, (kàdi udi mubanji) . . .(Kaa, ekèlekèlè!) . . .Ndi . . . (Mpindyewu Yèyè udi wàmbila Èkèleeziyà mpindyewu, Èkèleeziyà mulelèlè, kayiyi mikwàbò ayi to; bôbò mbàvwà bakine byenzedi byà beena Nikàlàwù abi.) . . .Ndi mumanyè dipenda dyà Nzambi dyà aba bàdi bàdyàmbe ne mbeena Yuda, kàdi kabàyi nàнку to, kàdi bôbò bàdi nsunàngòngà wa Sàtaanà.

¹⁰³ Mpindyewu, bàvwa bàdyàbakeena. Bàvwa batuuta kùdi bulanda èyo. Bà . . .Bàvwa babànyèngè byònsò bìvwàbo naabi. Bàvwa bìibàke kaèkèleeziyà kààbò kakesè mùshindù ewu, ne bu muvwàbo kasùmbù kakesè menemene, bàkaavwa babìpàte, èkèleeziyà munène awu nguvwa mubìpàte, babàpàtàkàje ànu mweyelu's. Ne nCyambè ne: “Ndi mumanyè. Ndi mumanyè ne bidi bikèngela bwà nwènù kwikala kudìsangishila mu disangu, nudi nudìsangishila mu kajila, anyi mwaba mukwàbò kanà wònsò wunùdi mwà kudìsangishila awu.” (Ne mèmè nkàadiku muyè mu nkità yà mwinshì mwà buloba mùdibi bikèngela kwikalabò bàdisangishila amu; kupweka mwinshì mwà buloba

amu bwà kudìsangishilamù, ne bikwàbò muntwamu.) “Ndi mumanyè makèngeshiibwa èbè, ne ndi mumanyè ntàtù yèbè, ne bikwàbò byà mùshindù awu, kàdi udi muvwijìibwe mubanji ku makèngeshiibwa awu.” Kaa, ekèlekèle! Anji ngambilaayi túng díbà didi dikèngeshiibwa dikwàta Èkèleeziyà, s’didi diMupà dikàndà. Ditu misangu yònsò ànu dípa Èkèleeziyà dikàndà, mu makèngeshiibwa awu. “Ndi mumanyè makèngeshiibwa èbè, kàdi udi mubanji.” Bwà cinyi? “Wèwè udi mushààle ànu kacya wàNdamata; udi mubanji. Kàdi makèngeshiibwa èbè awu kaènakù akutàpa ku mwoyi to.”

104 Mpindyewu, kùdì. . . Nukààvwakù bamòne anyi? Beena Nikàlàwù bàkaavwa badìpetèle ne nsunàngòngà mpindyewu. Ki cidi Bible mwambè mwab’ewu. Nukààvwakù bacimòne mwab’ewu mu mvensà wa 9 amu anyi?

*Mpenyi. . . kàdi. . . kabàyi nànkù to, kàdi bàdi
nsunàngòngà wa Sàtaanà.*

105 Uh-huh, Èkèleeziyà mulelèlà ùkaavwa mwipàciibwe. Beena Nikàlàwù bàkaavwa bangàte bukòokeshi, ne. . . bàkaavwa biipàte bantu bàvwa ne Nyumà Mwîmpè, ki bwà cinyi bóbò—bóbò kabàciivwa ne dikwàcisha nànsha dikesè bwàbò bóbò to. Bu nànsha ne Seemùnà, mu Asie amu, ùvwa mumanyè ne bintu abi. . . ne bifulu byà butùmbì byà bafwile diitabuuja bìvwa mwà kwikala bibìndìle, nùnkù’s mbanyùkùshiibwe. Nwamònu anyi? Mpindyewu, mu ngaakwilù mukwàbò, cìvwa. . . pààkafùndiibwà cipròfetà eci ne kutùmiibwaci kuntwaku, ne èkèleeziyà kucikwàtayè, ne kumònabò ne bóbò mbàvwa ne cyà kuvwàla cifulu cyà butùmbì cyà bafwile diitabuuja aci, mòna’s, bóbò bàvwa mwà. . . mòna’s, nùnkù’s ncibàkwàcishe bwówà bwà lufù. Bàvwa bóbò bindìle ciinè aci díbà kanà dyònsò. Kacyàkalwa mu cikondo cyàbò aci to. Pashiishe pàmwàpa bàmwè bàà kùdìbo bàakamba ne: “Èè, udi mumanyè’s—udi mumanyè’s, ndi nkwambila ne, mupròfetà awu ùvwa mutùpàkàne. Yone ùvwa mutùpàkàne, yèyè—yèyè. . . bwalu kì ncitwènzèkèle mùneemu mu Seemùnà to.” Mòna’s, byàkàkèngela bidimu nkàmà paanyimà. Nwamònu anyi? Kàdi pàdì Nzambì wàmba cintu kampànda, cidi ne cyà kwenzeka.

106 Pòpò apu ki patùdì twinyija diitabuuja dyètù, ànu pa Díyi dyà Nzambì apu. Nzambì ùtu ùshààla mukwàte ku mulayi ne mulayi wònsò. Nànsha byòbi ne. . . Wèwè udi mufwànyine kwela meeji ne bikèngela cyènzèkè mwab’ewu mene, kàdi pàmwàpa aci kí ncikondo cyà Nzambì bwà kwenzekaci to. “Kàdi Díyi Dyànyì kadyàkwalukila kùNdi kadiyi ne cìdidi dyenzè to, kàdi neDyùjè cidiDi dipàngidikila.” Nzambì misangu yònsò neàtwe ànu Díyi Dyèndè musinga, ne mu cikondo Cyàdì cìmpè Sungasunga neDinowè.

107 Pa nànkù bantu aba bàvwa mbóbò, èkèleeziyà wa kumpàla, kàdi mu èkèleeziyà awu mmùvwà ngiikàdilù uvwa mwà

kupàtuka paanyimà mu èkèleeziyà wa Seemùnà. Mpindyewu, pashiishe bàvwa ne cyà kuvwàla cifulu cyà butùmbì cyà bafwile diitabuuja, bìvwa bìkèngela bwà bààbùngi bàà kùdìbo bashipiibwè.

¹⁰⁸ Mpindyewu twàngatàayi mvensà wa—wa 10, patùdi tubala eci apa:

Kùcìinyi nànsha cìmwè cyà ku bintu ebi to (nsunàngòngà wa Sàtaanà) biwikalà mwà kukènga: mòna, dyabùlù neànwèlè...nwènù mu búlokò, bwà nwamòna mwà kuteeciibwa; ne nwènù nenùpetè dikèngeshiibwa dyà matùkù dikùmi: Wèwè ikàlà ne lulamatu too ne ku lufù, nènku nènkupèèshè cifulu cyà butùmbì cyà mwoyi.

¹⁰⁹ Kaa, ekèlekèlè! Bààkabàmbila bwà kabàcìinyi to pàvwàbo mwà kubìikidiibwà bwà kufwilabò ntèndeleele wabò—wabò. Mpindyewu, Mwanèètù wa bakàjì Wood, mwaba wònsò wùdi awu, ndi ntèkemenà ne eci cidi cikukwàcisha. Mwanèètù wa bakàjì Wood ùvwa ùngambila, ditùkù adi ne, ùvwa mufwànyine kuumvwa ne lutàtu bwà cinyi bàmwè bàvwa mwà kusùngidiibwa kàdi bakwàbò to. Misangu mikwàbò bìkèngela ùmanyè...Nzambi wàkambila bantu aba ne: “Mpindyewu, kanùcìinyi bwà bwalu abu to, bwalu Sàtaanà neànwèlèmu, bwalu kasùmbù kàà beena Nikàlàwù kàdi kalwè ne kànwèlamu aka, bwalu Mèmé nènnullèkelè nùfwe bwà bwalu Bwànyi. Kàdi Nènnùpèèshè cifulu cyà butùmbì cyà Mwoyi mu ditùkù adi.” Pa nànkù kanuyi. . .

¹¹⁰ Mpindyewu tàngilàayi, Yèyè mmwambè. . .Mpindyewu, bu nwènù mwà kumòna patùdi tubala mvensà wa 10 ewu apa. Ngànjì mmubalùlùlèbi:

Kùcìinyi nànsha cìmwè cyà ku bintu ebi biwikalà mwà kukènga to: mmòna, dyabùlù neèlè bàmwè bàà kunùdi mu búlokò, bwà nwamòna mwà kuteeciibwa; ne nwènù nenùpetè dikèngeshiibwa dyà matùkù dikùmi: kàdi wèwè ikàlà ne lulamatu ne ku... (Nukààvwakù bamòne ne aci kaciyèna too ne ku anyi? Kì nnè too ne ku lufù to, kàdi “ku” lufù. Nudi bacyùmvwè anyi?) . . . wèwè ikàlà ne lulamatu ne ku lufù, . . . (Nwamònu anyi? Ne bóbò bààkashààla ne lulamatu.)

¹¹¹ Mpindyewu Yèyè kwamba, Sàtaanà...Nukààvwakù bamòne ne nganyì udiYè—nganyì udiYè mutèèkè ne nguvwa wenza aci awu? Mpindyewu, *nsunàngòngà wa Sàtaanà* ewu ùvwa “mbeena Nikàlàwù.” Aci tudi bamanyè. Kabìvwa nànkù anyi? Dìbà adi ci vwa mbulongolodi, bwakwidi bìvwa bìjuukà bìvwa mwà kukèngeshisha bantu aba, bìvwa mwà kukèngeshisha bantu aba, kàdi bìvwa bìkèngela bwà kwikalabò ne lulamatu ku Èvànjeeliyò ne ku lufù. Nukààvwakù bamòne mu mushìngà wà dibàkà anyi? Kì nnè too ne ku lufù nkutùdi tutàpuluka

to, kàdi “*ne ku* lufù nkutùdì tutàpuluka.” Nwamonu anyì? Mpindyewu, *ne ku* ne *too ne ku* mbishiilàngàne. Mpindyewu, bìvwa bìkèngela bwà kwikalabò ne lulamatu kùdì Kilistò ne ku lufù. “Pwekà wèwè ànu naaci ku lufù aku. Kùcìinyi to, bwalu Mèmè nènkupèèshè cifulu cyà butùmbi.”

¹¹² Mpindyewu “matùkù dikùmi” àdìbo baàmba mwaba ewu aa, matùkù dikùmi awu. Ditùkù mu Bible didi dìleeja cidimu. Nènkù *matùkù dikùmi* àvwa “mbidimu dikùmi” byà ndekeelu byà bukòokeshi bwà D-i-o-c-l-é-a-t-i-o-n ewu, Dioclétien. Dioclétien. Dioclétien, ùvwa mfùmù munène wa bukalenge bwalàbàle awu wàkakòokeshi mu byà ndekeelu. . . Èè, kùvwa bamfùmù mulongolongo bàà makalenge maalàbàlè bààkakòokeshi mùsangu wà Cikondo cyà Èkèleeziyà wa Efèsò. Ne Néron, ngeela meeji, ùvwa umwe wa kùdìbo. Kàdi Dioclétien ewu mwab’ewu nguvwa wa ndekeelu wàkakòokeshi, mu bidimu dikùmi byà ndekeelu abi, kàdi yèyè nguvwa mutàmbe kwikala mukèngeshanganyi ku bònsò ku dyela dyà mashi panshi. Wàkaditèèka ànu ku luseke lwà kasùmbù aka nènkù bóbò—bóbò kusebeyabò beena Kilistò ne cikisu, kubàshebeyabò, bàkabòsha, bè—bèza bintu byònsò, ne bìvwa mbidimu dikùmi byà dikèngeshiibwa dyà ditàmbe kwikala dyà mashi. Ne cikondo cyèndè ne bukòokeshi bwèndè bìvwa kuumukila ku cidimu cyà 302 too ne ku cyà 312. Aci ki cyàkajikijà Cikondo cyà Seemùnà, ne dibwela dyà Constantin. Nènkù yèyè wàkalwa mu cidimu cyà 312, Constantin awu. Ki àvwa matùkù dikùmi à makèngeshiibwa. Nènkù cyàkabanga ne Néron ne cyàkajika ne Dioclétien. Nènkù kubangaci ne Néron, civwa lwà mu cidimu cya 64 paanyimà pàà lufù lwà Yesù pàakabàndà Néron mu nkwasà.

¹¹³ Mpindyewu, mvensà wa 11 mmulayi. Mpindyewu netwàngatè eci kumpalà kwà kujikija:

Ewu udi ne maci, ùmvwè cidi Nyumà wàmbila maèkèleeziyà; Ewu udi ucimuna kààkutàcishiibwa ne lufù lwibidì to.

¹¹⁴ Mpindyewu, bikèngela ngàmbèkù cintu kampànda kaaba aka, aci bwà. . . Mèmè ncyèla meeji, mu mwoyi wànyì, kàdi ncyi ncyàmba to, dìbà adi ndi mwena lubombo. Nwamònu anyì? Ndi muswè bwà nwènú kumòna cintu kampànda mu Mufundu ewu, ne ndi ngeela meeji ne civwa bwànyì mèmè cimwè cyà ku bintu bikolè bwa kuumvwa byà bitàmbe bunène ntàntà mule too ne pàngàakalwà kujandula. Mpindyewu tùbalàayi aci ne ntèmà yònsò, mpindyewu. Nwamònu anyì?

Ewu udi ne maci, (Mu ngaakwilù mukwàbò ne: “udi ne maci à kuumvwa,” nwamònu’s, makàngwila Nyumà.) ùmvwè cidi Nyumà wàmbila maèkèleeziyà; . . .

Mpindyewu mònaayi, cintu cimwècimwè eci, dikèngeshiibwa edi ne bikwàbò byònsò bidi bilwa. Katupà

ne katùpà kààci kònsò kàdi kàtentamangana ne èkèleeziyà ne èkèleeziyà yònsò. *Maèkèleeziyà.*

...*Nyumà wàmabila maèkèleeziyà; Ewu udi ucimuna...* (Mu èkèlèèziyà kaayi? Wa beena Efèsò anyi? Èyowà. Èyo. Seemùnà anyi? Èyowà, yònsò ayi.) ...*Ewu udi ucimuna mu èkèleeziyà yònsò kààkutàshiiibwa ne lufù lwibîdi to.*

115 Yêyè ùdi ucimuna cinỳi mu èkèleeziyà wa Laòdikiyà? Udi ucimuna beena Nikàlâwù, ùcimuna maalu à pa buloba, ùcimuna màngumba aa, ùcimuna byà bunsaserdòsè ebi, ùcimuna bintu byònsò byà pa buloba ne ùdìfila, ne ùnanga Kilistò. Kwàkutàcishiibwa ne lufù lwibîdi to. Bwà cinỳi? Ùdi ne Mwoyi wà Cyendèlèèlè. Mwoyi wà Cyendèlèèlè kawèna mwà kufwàku to. Yesù wàkamba ne: “Ewu udi umvwa dīyī dyà kùNdi ùdi ne Mwoyi wà Cyendèlèèlè, kààdyàkufwàku to. Nèmmubiishè ku lufù ku ditùkù dyà ndekeelu.”

116 Mpindyewu, mpindyewu, kùdi...Mpindyewu, newikalè mwà...Nekwikalè bààbùngi bààbènganganà ne cyòci eci, kàdi ndi muswè bwà nwèlanganè meeji bikolè kumpalà kwà nwènu kwangata dipàngadika dyènu. Nwamònu anyi? Nèngàmbè cintu kampànda mpindyewu:

117 Ki bwà cinỳi ncyèna ngiitabuuja ne kùdi ifernò wa Cyendèlèèlè to. Kakwèna mwà kwikala ifernò wa Cyendèlèèlè to. Bwalu bu ne kùvwakù ifernò wa Cyendèlèèlè, dībà adì kùvwà misangu yònsò ànu ifernò wa Cyendèlèèlè, bwalu wa Cyendèlèèlè...Kùdi mùshindù wà Mwoyi wà Cyendèlèèlè ànu wùmwèpelè, ki utùdi bònsò tuditàcishila. Nènkù byòbì ne newòshikè kashidi ne Cyendèlèèlè, nànkù's nebikengelè bwà wikalè ne Mwoyi wà Cyendèlèèlè munkaci mwà kwoshika, ne dībà adì's ncifwànyine kwikala Nzambì munkaci mwà kwoshika. Kwèna mwà kwikala ne iferno wa Cyendèlèèlè to, kàdi Bible ùdi wàmba patòòke ne “ifernò wàkafùkiibwa.” Ne piikalàye mufùkiibwe, kī ngwà Cyendèlèèlè to. Cintu kanà cyònsò cidì cyà Cyendèlèèlè eci kacitukù cifùkiibwe to; ciwva ànukù misangu yònsò, ncyà Cyendèlèèlè. Ne Bible ùdi wàmba ne “Ifernò wàkafùkiibwa bwà dyabùlù ne banjèlò bèndè.” Ifernò wàkafùkiibwa, kī ngwà Cyendèlèèlè nànsha. Ne ncyèna ngiitabuuja ne muntu neànyookiibwè Cyendèlèèlè to.

118 Ndi ngiitabuuja ne Bible ùdi wàmba bitòòke tòò apa, ne: “Ewu udi ucimuna kàkutàcishiibwa ne lufù lwibîdi to.” Mpindyewu “lufù.” Mwakù *lufù* wùdi wùfùmina ku...mbwena kwamba ne, cidì “ditàpuluka.” Mpindyewu, patùdi batàpulula ne Nzambì, mu mpèkaatù, tukààdi bamanè kufwà; ki mùdi Bible mwambè. Tudi basàkiibwe kule ne Nzambì, tudi bakòsa, tudi bafwè mu mpèkaatu ne mu matomboka; tudi beenyi kùdi Nzambì ne ku bubanji Bwèndè busanga. Ne pashiishe patùdi

tupeta Nzambi ne tupeta Mwoyi wà Cyendèlèlè, tudi bânà Bèndè ne citùpà cyà ku Yèyè.

¹¹⁹ Mwanàanyi wa balùme mutekètè wàwa, Joseph, ùdi citùpà cyà ku mèmè, nànsha cìndì... mufwànyine kwenza ciikàle cinganyi. Yèyè... Ndi mufwànyine... Yèyè mmufwànyine kwikala kàyi ne... Bu ne mvwa muntu mubanji munène ne mwikàle ne bumpyanyi búngì cyanààna, yèyè mmufwànyine, kubènga kupyàna mene kantu; kàdi yèyè ùdi ànu mwànà, ùdi citùpà cyà ku mèmè. Bushùwà, yèyè ùdi citùpà cyà ku mèmè. Mpindyewu, ncyèna mwà kumuvilakù to ànu mündì ncyi mwà kudivila mèmè mwinè to, bwalu yèyè ùdi citùpà cyà ku mèmè. Diteeta dyà mashi ndifwànyine kuleeja ne yèyè ngwanyì mèmè. Nwamònu anyi?

¹²⁰ Ne diteeta dyà Mashi didi dileeja ne wèwè udi wa Nzambi anyi to. Nwamònu anyi? Nudi bânà bàà Nzambi ne nudi ne Mwoyi wà Cyendèlèlè. Kàdi musùukà wùdi wènza mpèkaatù, *musùukà* awu ki wàtàpuludiibwà. Ncyà bushùwà anyi? Dìbà adi kawàkwikalakù kàbìdì to. Mpindyewu tàngilàayi. Cintu cyònsò cìvwà ne ntwàdijilu cìdì ne ndekeelu, bwalu cintu cyònsò cìvwà ne ntwàdijilu mbufùki. Kàdi Nzambi kààkafùkiibwa to, Yèyè ùvwa misangu yònsò ànu Nzambi. Kakwènakù mwaba uvwaYe mufùkiibwe to. Nènku mùshindù wùmwpèlè wutùdiku mwà kwikala ne Mwoyi wà Cyendèlèlè ngwà kwikala citùpà cyà bufùki abu. Butùmbi's wè! Kaa, twìkalapù mwà ku Cìmona's wè! Udi umòna cìdì Nyumà Mwìmpè ùkwenzela anyi? N'Nyumà Mwìmpè, Mufùki Yèyè mwinè, Nzambi Taatù mu mmwènekelu wa Nyumà, ùbìikidiibwa ne "Nyumà Mwìmpè" bwalu Ùvwa pa mubidi mubiikidiibwè ne n'Yesù, Mwân'Èndè; wàkafùka Yè Yesù awu, mubidi awu, ki bwà cinyi byàkakèngela bwà kufwàWù. Nzambi wàkasòmbela mu mubidi wa buntu ewu, ne kabùlù kàà mashi kààkataayika, ne Mwoyi wa mu kabùlù kàà mashi aku wàkaalukila.

¹²¹ Ki bwà cinyi mukuukwidi wa kale mu Dipungila Dikùlukulu kàvwa mwà kuumuka... ùvwa ùmuka ne dipiilà òmwèdìmwè òvwaYe naadi pàvwaYe mulwè adi. Kàdi mu Dipungila Dipyadìpyà, mùdì Ebèlù mwambè, ne: "Mukuukwidi pàdiye ànu ùkezudiibwa musangu wùmwe kàcyèna kàbìdì ne civùlukilu cyà mpèkaatù to."

¹²² Mpindyewu, Dipungila Dikùlukulu; bàvwa bàlwa ne mwànà wa mùkòòkò, ùvwa ùmulàadika panshi, ùmutentekela byanza, mukuukwidi awu; mwakwidi ùvwa ùmukòsa muminu, yèyè ùvwa ùmvwa mùvwaYe ùzònta mashi, ne ùmvwa mwadi wèndè awu. Nènku ùvwa ùfwa, ne yèyè ùvwa ùmvwa kaamubidi kakesè aku kùuminyina, ne ùvwa mufwè. Ùvwa mumanyè ne uvwa ne cyà kufwa nyèyè; mwànà wa mùkòòkò awu ùvwa mwangàte kaaba kèndè. Mwakwidi ùvwa wàngata mashi awu, uatèeka pa cyoshelu ne—ne mwìshì wùvwa wùbànda, nènku cìvwa ndisambila dyà difwidiibwa dyà luse bwà mukuuk-...

[Katùpà kàà mukàbà wà mèyì munda mutupù—Muf.] . . .kàdi mwoyi wà nyama awu kawùvwa mwà kwalukila pa muntu ne kukùmbananganawù ne wà muntu to, bwalu nnyumà wà nyama. Mwoyi wa nyama ne mwoyi wa buntu, kàyìvwakù mwà kukùmbanangana to. Kàdi pàdi. . .Ki bwà cinyi ùvwa ùya ne dijinga òmwèòmwè dyà kwenza mpèkaatù adi, cintu cimwècimwè aci. Ùvwela bwà dyenda dyà masandi, ne ùlàmbula mulàmbù wèndè, kàdi wàlukila ne cintu cimwècimwè aci mu meeji. Ncyà bushùwà.

¹²³ Kàdi apa pàdi mukuukwidi. . .Kaa, Èkèleeziyà wa Nzambi, kanùpangikù kuumvwa eci to! Mukuukwidi, pàdiye ànu ùseemena bulelèlè kùdi Mwànà wa Nzambi ne ku diitabuuja ùtenteka byanza pambidi Pèndè (Kaa, ekèlekèle!), uMutàngila mumpàla amu ne makòdi awu maMulembèlèle mwisù, Mashi àMupwekela mwisù, umvwa bìsaamà abi byà “Nzambi Wanyì! Nzambi Wanyì! WàNdekèdi bwà cinyi?” Kaa, mwanèètù, paùdi umòna mushinga kaayi wùdi mukufwile, ne Ùvwa Nganyi, Èmanùwèlè, Nzambi ùfwa pa kaaba kèèbè.

¹²⁴ Dìbà adi cidi cyènzekà ncinyi? Mukuukwidi musangu awu, pàakataayishiibwà kabùlù kàà Mashi aku mu Mwànà wa Nzambi. . .Civwà cyenzè kabùlù kàà mashi aku ncinyi?

¹²⁵ Wèwè udi cinyi? Udi kabùlù kakesè kàà mashi kàdi kafùme kùdi tatwèbè. Mukàji kàtu ne tubùlù twà mashi to. Mu—mukàji ùdi yèyè ùpàtula ànu diyi; cyamù cyàtooyikila mayi, bwèndè bùdi ànu bwà kwambula twà—twà—twànà. Kàdi mashi àdi àfuma kùdi mulùme, ki bwà cinyi mwà—mwànà ùdi wàngata dìnà dyà taatù. Ne pashùishe, kàdi, mukàji udi usèdiibwa kùdi mulùme, ùdi wangata dìnà dyèndè, bwà bânà; mukàji ùdi ulwa cyamù cya ditooyishila mayi bwà mwànà wámwilayè mulùme awu. Kàdi ànu múmvwà ngamba ne: cikuka cyà nzòlò cidi mwà kwela diyi, kàdi piikalàci kaciyi cipetàngàne ne citàalà to, diyi adi kadyàkutooyikakù to.

¹²⁶ Mbwena kwamba ne, mèmè kwamba ne, ki bwà cinyi tudi ne èkèleeziyà yàbùngì yà kale, ya mashika, ya bintu byà kwisùkwisù leelù ewu. Bàvwa ne mmwènenu wa beena Nikàlàwù ewu, biikàle ne mushiki wà maswa mùle tètè ne mayi mabolè, nènku kaàkutooyikakù nànsha bwalu kaèna. . .Wèwè udi mufwànyine kubènzela cintu kanà cyònsò (kubàbiikila ne mbèèpiskòpò, balami, ne bikwàbò byònsò), kabààkwitabuujakù bimanyinu bìdi bilondà beena kwitabuuja to, bwalu kacya kabàtukù bapetàngàne ne Mulùme awu, Yesù Kilistò to. Bu wèwèku mwà kupetangana ne Mulùme wa bukolè bwà Nzambi awu. . .

¹²⁷ Pàakataayishiibwà kabùlù kàà Mashi aku ku Kàlvàriyò, ne Mwoyi wùvwà munda amu awu, Yèhowàh mwànà. . .Kaa, s’bivwa bikèngela kwikalabi bìpapulangana’s!

128 Nudi bamanyè's, bantu bônso bàdi bàkèba cimanyinu. Kí mmwómò anyi? Muntu yónsò ùdi wàmba ne: “Kaa, ndeejèku cimanyinu.” Mwena Yudà wàkamba ne: “Ndeejè cimanyinu.”

129 Indilaayi nnùpèèshè cimanyinu. Nzambi wàkanùpa cimanyinu musangu kampànda. Bààkalòmba cimanyinu. Izalèlèlà wàkalòmba cimanyinu. KwambilaYè muprófetà ne: “Némbàpèèshè cimanyinu cyà kashidi: virgò neimitè difù. Virgò neimitè difù ne neàlele Mwànà wa balùme.” (Amen.) “NebàMwinyikè dìnà ne Èmanùwèlè, ‘Nzambi neetù.’” Cimanyinu cyà citàmbe bunènè cikaadiku cipèèbwe.

130 Pàvwà Nzambi, Mufùki wa maulu ne buloba awu, mwenzè ndongolwelu wa díbà ne mabùlunga apu. Imànà ku Mukùnà wà Palomar kwàka ne ùtangidilè mu tulòndò kuntu kwàka, nènku udi mwà kumòna mìliyò lukàmà ne makùmi àbidì ya bidimu byà bukènkè bwà cibwàshìbwàshì. Andamunà cyòci aci mu kilòmèètà, kàdi dyàmwàmwa kùcìdì ànu ngondo, ne mìtootò, ne maulu ne malaba, ne Yéyè ngwàkenza byónsò abi. Wàkabyèlela ànu mupùùyà ku byanza Byèndè nùnkù ewu. Èyowà's!

131 Kàdi Mufùki munène awu ngwàkalwa Musùngidi wanyì. Kupweka ku kabùlù kakesè kàà Mashì, kakùyì ku mulùme to, kàdi mulwilè mu buuvirgò ku mukàjì kampànda; ne kwangata bungungu bukesè bwà kùdì mukàjì ebu, ne kuDifwimbila nzùbu mukèsè ne kusòmbelamù. Kaa, s—s—s'bvìwwa bikèngela kwikalabi byà bikòka ntèmà's! Yèhowàh! Yèhowàh, pa mushikì wà tùmvi twà nyama mu cikùmbì, ùdila mwadi. Yèhowàh, mu cidìilù cyà ngombe cyà bisoosà. Kì cimanyinu cyà kashidi ncyàci, bàmwè bàà ku bantu banènè badyàmbi aba! Yèhowàh, Nzambi, Mwànà wa mu dibòko ùdila mwadi (Àleluuyàh!) mu cikùmbì cìnunka mupùùyà mubolè. Kì pashìishe tudyàmbidila pèètù mutùdì kampànda, mutàdike dyùlù muulu; mvùla's mmufwànyìne kumata, mufwànyìne ne kukutùkija; kàdi wenda uya pèèbè udyàmbidila mùdì kampànda. Nènku Yèhowàh mulààdika mu cikùmbì, pamutù pàà—pàà mushikì wà tùmvi twà nyama, udila mwadi bu mwànà mukèsè. . . mwànà mukèsè wa mu dibòko. S'bvìwwa bikèngela kwikalaci cyà cikòka ntèmà! Aci's ncimanyinu. Nzambi wàkamba ne: “Nènnupèèshè cimanyinu cyà kashidi.” Aci's ncimanyinu cyà bushùwà eci. Yèhowàh, ùnaya bu mwànà wa balùme. Yèhowàh! Yèhowàh, ùkwàta mudimu mu ditanda dyà mukoonyi wa mabaya, ùkòsa mabaya ne mwelè wà mabaya bu mukoonyi wa mabaya. Àleluuyàh! Ekèlekèle, kaa, ekèlekèle! Yèhowàh, wòwèsha mulòbi màyi ku makàsà. “Nènnupèèshè cimanyinu.”

132 “Kaa, kàdi bikèngela twikalè ne balombodi bàà ntèndeleelelu abu, nudi bamanyè's, bavwàle mizàbi ne myonjì yónsò yà mu bifùka ayi, nkoolò, ne . . .” Nwamònu anyi? Kaa!

133 “Nènnupèèshè cimanyinu cyà kashidi.” Yèhowàh, Mwimàne mu bulà bwà tubàdì ne makòdi kwìsù. Yèhowàh,

mukùdika butakà, mu mubidi, pankaci pàà maulu ne buloba. Wàkadyombola bundù bwà nkurusè. Tudi ne lupingu Lwèndè kuntu kwàka ne kaamukùsù kakesè kaMujingila; mu bushùwà bwà bwalu awu ùdi ànu mmusongi wa lupingu awu udi mwenzè nànkù. BàakaMuvùùla bilàmbà kuMushiyabò butakà, kuMufwishabò bundù! Kaa, musumbà wa beena lubombo awu abu pààlwà dîbà adi! Edi nditùkù dyà muntu, ditùkù dyà Mukalenge dilwalwa. Yèhowàh! Yèhowàh, ùpunga ne lufù, èyowà, cintu nànsha cimwè kaciyi cyenzèke to. Yèhowàh, ùsambila, cintu nànsha cimwè kaciyi cyenzèke to. Hmm. Ncyà bushùwà. Cìvwa ne cyà kwikala cyà cikòka ntèmà! S'ki cimanyinu cyà kashidi ncyòci aci. Ki cimanyinu ncyòci aci cìvwa bantu bònso bafwànyine kumanya. Pashìshe kufwàYe, Yèhowàh kufwàYe. Pashìshe buloba kubangabù kuzakala. Kaa, ekèlekèle!

¹³⁴ Pashìshe Wàkajuuka mu lukitá ne wàkabànda mu Dyulu. Yèhowàh, wàlukila mu mmwènekèlu wa Nyumà Mwîmpè bwà kwikala ne mwoyi mu Èkèleeziyà Wendè, munkaci mwà bantu Bèndè. Butùmbi's wè! Yèhowàh, wènda ùpìcila mu èkèleeziyà, ùjingulula meeji à mu mitù. Yèhowàh, wòndopa babèedi. Yèhowàh, wàkwila ku mishiku mu mùshindù wà muntu awu kàyi ne bukòntononyi bwèndè yèyè mwinè to. Yèhowàh, wàlukila mu Anglais ne ùcikudimuna. Udi ukèba cimanyinu anyi? Amen! Yèhowàh awu wàkapweka kuya kùdi ndumbà, kumujuula panshì, mwaba wùvwàye—wùvwàye wa ciipanshì menemene mu mùshindù wà mbwa kayiyikù miswè kumutàngila to, ne kumusukula kumuvwija mutòoke tò bu nèjè ne kumupèèsha mwoyi mukezùke bu mudi cilòngò cyà mbata amu. Kaa, ekèlekèle! Yèhowàh, wàngata kanwàyi mulààle kwàka mu kajila ne njiji ku mishiku kwònsò eku, ne umufikisha ku diyiiisha Èvànjeeliyò . . . ? . . . Mashì à Yesù Kilistò miikàle àtùkezula!

¹³⁵ PàvwàYe pa buloba, Wàkaya ku cimenga cìvwa citàmbe kwikala cyà ciipanshì cìvwàku, ne kùdi bantu bàà batàmbe kwikala bàà ciipanshì bàvwàku, ne kuMutwabò dìnà dyà ditàmbe kwikala dyà ciipanshì dìvwàku adi. Ncyà bushùwà. BàakaMwenzela byà bitàmbe bibi, ne kuMutwabò dìnà dyà ditàmbe bubì dìvwàku dìfwànyine kubìikidiibwa ne: “Beelèzèbùlà,” démon. Dyà ditàmbe kushààdila dìvwàbo mwà kuMupèèsha, dyàkaMupèèshà muntu.

¹³⁶ Kàdi Nzambì wàkaMubiisha ku lufù, ne WàkaMupèèsha Nkwasa wa butùmbi wa kuulu menemene mu mùshindù wà bikèngela Àtangijè mèsù panshì bwà kumònaYè Dyulu. Amen! Butùmbi's wè! Ne kuMupèèsha Dìnà kumutù kwà dìnà dyònsò didì ditéèdiibwe mu Dyulu ne pa buloba, ne fàmiyè mujimà mu Dyulu ne pa buloba mmuMwinyika Yèyè. Ki meeji àkaMwelelà muntu ngòwò awu; ki meeji àkaMwelelà Nzambì ngòwò awu. Èyi Nzambì, enzàku bwà meeji àànyì ikalè bu Èbè, Taatù. Èyowà's, mukalenge. Èyi Dìnà dyà mushinga!

137 Mpindyewu: “Ewu udi ungiitabuuja Mémè ùdi ne Mwoyi wà Cyendèlèèlè.” Mpindyewu, piikalàku mùshindù wa Mwoyi wà Cyendèlèèlè ànu wùmwèpelè, nènku wèwè uwùpeta ne twètù twenda tukèbangana naawù kupìcila kù Yesù Kilistò, s’ki Mwoyi wà Nzambi ngwòwò awu. Dìbà adi pàakataayishiibwà kabùlù kàà Mashi aku pa Mwànà wa Nzambi, ne Yèhowàh mukèse uvwa mukàngila mu mùlàngi munda mwà Muntu wàkabiikidiibwà ne n’Yesù awu (pàvwà munda Mwèndè musòmbèle kaabujimà kàà Bunzambi mu mùshindù wà mubidi apu), nènku mpindyewu patùdì twitaba Mashi *awu* bwà dilekelediibwa dyà mpèkaatù yètù, Nyumà awu uvwa kàyì pambidi pàà muntu to, kàdi pàà Nzambi. . . Butùmbi’s wè! Bible mmwambè ne: “Mashi à Nzambi.”

138 Muntu kampànda wàkamba ne: “Vùlukà ne, Yèyè. . . Kwàmbikù cintu nànsha cìmwè pa bìdì bitàngilà beena Yudà to, bwalu Yèyè ùvwa mwena Yudà.” Yèyè kàvwa mwena Yudà to. Kàvwa nì mmwena Yudà nì ngwa bàà Bisàmbà byà bendè to, Yèyè ùvwa Nzambi. Ncyà bushùwà. Yèyè ùvwa Mashi mafùka. Nzambi wàkaènta àà pabwàwù. Àvwa Èndè Yèyè mwinè, ne ku Mashi mafùka awu tudi tulitaba bu ditùfwila dyà luse bwalu Yèyè wàkafwà lufù alu bwètù twètù. Kabùlù kàà Mashi aku kàakabayika, kulekelelakù Nyumà Mwimpè awu bwà kulwaYè pambidi pèètu, nènku mpindyewu tudi bânà bàà balùmè ne bàà bakàjì bàà Nzambi ku dilediibwa dyà Nyumà. Dìbà adi Mwoyi wùvwà wà Nzambi awu, wùvwà kawùyì ne ntwàdijilu anyì wikalà kawùyì ne ndekeelu awu, ngwànyì mèmè ne ngwèbè wèwè ku ngàsà wa Nzambi mu Yesù Kilistò. Ki bwalu mbwòbù abù’s.

139 Mpindyewu, “ifernò,” netwàlukilè ku cyòci aci mu katanci emu. Ndi nnwàmbila ne—ne kakwènakù mwà kwikala. . . Ndi cyà bushùwà ngiitabuuja ifernò wa ùlàkuka kapyà awu. Èyowà’s, mukalenge, Bible ngudi mwambè nànkù, dijiba dyà kapyà. Mpindyewu, kàdi aci kacyèna mwà kwikala cintu cyà kashid-. . . kacyèna mwà kwikala cyà Cyendèlèèlè to. Ncifwànyine kwikala. . . Bible kàtukù mwambè ne ngwa Cyendèlèèlè to, Ùdi wàmba ne ifernò “wa kashidi” awu. Kèna wàmba mwakù wa Cyendèlèèlè to, ùdi wàmba ifernò “wa kashidi” awu. Mpindyewu, mmulongolwela dyabùlù ne banjèlò bèndè; ifernò wa kashidi, kàyì wa Cyendèlèèlè to. Mpindyewu, paanyimà. . . Musùukà awu wùdì mwà kukèngeshiibwamù bwà bìnzedi byàwù munda mwà bidimu mìliyò dikùmi, bwà cyòsò cindiku pàanyì mumanyè. Ncyèna mumanyè cidi *wa kashidi* mufwànyine kwikala ku mèsù kwà Nzambi to. Ncifwànyine kwikala bwà tusunsa tùtaanu, ncifwànyine kwikala bwà bidimu mùliyò, ncifwànyine kwikala bwà bidimu mìliyò dikùmi, kàdi nekùlwe cikondo cìikalà musùukà awu mwà kulekela diikalakù.

140 Cìdì Bible mwambè ncyòci eci, nwamònu’s:

. . . *Ewu wàcimuna kààkutàcishiibwà ne lufù lwibìdì to.*

¹⁴¹ Lufù lwà kumpàla nditapulukungana ne bananga bèètù. Tudi tubwela mu Bwikadi bwà Nzambi, kí mpambèlu pàa Bwikadi Bwèndè to. Nwamònu anyi? Mpindyewu, pìikalàbì ne kùdì lufù lwibìdì, díbà adi's cìdì ne cyà kwikala lufù lwà musùukà. Nènku díbà adi ewu udi ucimuna maalu a pa buloba, anyi ùcimuna bintu byà pa buloba, ùdì ne Mwoyi wà Cyendèlèlè ne kààkulengiibwa kùdì lufù lwibìdì to. Kí bwalu mbwòbù abu's, Mwoyi wà Cyendèlèlè. Kàdi—kàdi ngènzàmpèkaatù. . . Bible mmwambè ne: “Mukàjì udi ne nsòmbelu wa bisànkasanka mmufwè pàdiye ne mwoyi apu.” Ncyà bushùwà anyi? “Musùukà wùdì wènza mpèkaatù, wòwò awu newùfwe bulelèlà.” *Kufwà* ncinyi? “Kutàpuluka” ànu menemene, “kùciyikù kàbìdì to.” Nwamònu anyi? Mpindyewu, mmuumusha, ncyà bushùwà. Mmuumusha, kakùcyèna kàbìdì bwalu bwàwù to. Nebikengèlè cikondo bule kaaýì bwà cyòcì aci? Newùpwekè wùpicilè mu njila umwèumwè wùvwàwu muvwilè awu, ne nebikafikè mu mùshindù wa ne kawàkwikalakù kantu nànsha kàmwe kààshààla ku wòwò to. Newàlukilè ànu ku civwàwu mwenjìibwe aci.

¹⁴² Tudi bafwànyìne kwangata kabùlù aku, ne kutaayisha kabùlù kupeta kabùlù kàmwe, kupeta kabùlù kakwàbò, too ne paùdì ukafika ku kabùlù kàà kumpàla aku; ubwela mu kabùlù aku, díbà adi udi ne mwengùngù wà mashi awu; udi ubwela mu myengùngù yà mashi mishìilèshìilàngàne, ne pashìishe udi upweka too ne ku katùpà kakesè kàà kabùlù aku: kí mwoyi ngwòwò awu. Bòbò kabèènakù mwà kupeta aci to. Kí mbamanyè kantu nànsha kàmwe pa bwalu abu to. Mpindyewu, ndekeelu wa byònsò mwoyi awu newùfike mu mùshindù wà kawùciyikù kàbìdì to; cyònsò cìdì mwengùngù wa mwoyi awu aci, mèmè ncyèna ngiitabuujà ne cìdì ne mwengùngù kampànda to. Ncifwànyìne kwikala cyà nyumà.

¹⁴³ Ne pashìishe, mu cyòcì aci, ndekeelu wa byònsò necìtapulukè ànu menemene ne kacýàkwikalakù kàbìdì to. Aci kì cìdì Bible mwambè ne: “Musùukà wùdì wènza mpèkaatù, newùfwe.” “Nènku aba bàdì bàcimunà mu bikondo byà èkèleeziyà ebi kabààkutàcishiibwa ne lufù *lwibìdì* to.” Mubidì wùdì wùfwa dyàmbedi, musùukà wùdì wùfwa pashìishe ne kawàkwikalakù kàbìdì to. Nwamònu anyi? Aci cìdì. . . nudi nwitabuujà ne Bible ngudi wamba nàнку awu anyi?

¹⁴⁴ Mpindyewu vùlukàayi ne, ifernò yèyè mwikàle wa Cyendèlèlèlè, nàнку Bible's mmwambè cyà mafi pàdiye mwambè ne “ifernò wàkafukiibwa.” Ne díbà adi byòbì ne muntu neòshìibwè bwà Cyendèlèlèlè, mu ifernò, díbà adi's bìvwà bikèngela bwà ìkalè ne Mwoyi wà Cyendèlèlèlè bwà kwikalayè mumanyè bìdì bìpitakanà, bwà kwoshikayè. Ncyà bushùwà anyi? Èè, kùdì mmwènekèlu yà Mwoyi wa Cyendèlèlèlè búngì

kaayi? Umwepelè. Ncyà bushùwà. Mwoyi wà Cyendèlèlè ànu wùmwèpelè.

¹⁴⁵ Mpindyewu, kùùmukukù wàya wenda wamba ne: “Mwanètu Branham kàtu wìtabuuja ifernò to.” Mwanètu Branham ùtu cyà bushùwà wìtabuuja ifernò. Bible ùdi ùlongesha ne ifernò ùdikù. Ànu mudibi bulelèlè ne kùdi mwaba wà—wà diikisha amu, kùdi mwaba wà—wà dinyookiibwa. Ne ncyà bushùwà ne Nzambi neénzè ne musùukà wùdi wùMwenzela mpèkaatù awu wùnyookiibwè. Nènku bwà kwikala mubenge Yesù Kilistò bu Musùngidi webè, ncyà bushùwà ne newùnyookiibwè bwà bwalu abu. Kàdi nekwikalè cikondo ciwikalà kuciyükù kàbìdi to. Kàdi mmiliyò búngi kaayi yà bidimu yikalàbi mwà kwangata bwà wèwè kwalukila ku cyòci aci, ncyèna mumanyè to. Kàdi cikondo kampànda. . .

¹⁴⁶ Udi muntu wa cikondo paùdi kùyi mulediibwe cyàkàbìdi, díbà adi udi muntu wa Cyendèlèlè. Ne mùshindù wùmwèpelè wùdi mwà kuCipeta nkwikala ne citùpà cyà Nzambi munda mwèbè, cidi Mwoyi wà Cyendèlèlè awu aci. Nudikù mwà kucimòna anyi? Cyà bushùwà.

Ewu udi ne maci, ùmwè cidi Nyumà wàmabila maèkèleeziya; . . .

¹⁴⁷ Mèmè ndi muMunangè. Kàdi wèwè? Ndi ne disànkà dyàbúngi dyà kwikala ne Mwoyi wà Cyendèlèlè. Aci kacýèna cìntàcishakù kàbìdi to, bwalu tudi ne Mwoyi wà Cyendèlèlè mpindyewu. Ne ndi mumanyè nànkù, ne ndi ne dyeyemena ne muntu ne muntu neikalè naaWù, twètù bònsò.

¹⁴⁸ Irénée, èyowà, mvwa ne kabèji mwab’ewu pa Irénée, kàà ne, “bwà kubala bwalu-bulonda ebu.” Cidi cyenzè ne Irénée àsungudiibwè mbwalu yèyè ùvwa ne bimanyinu byà Èkèleeziyà wa Mpenta (byà ku cibangidilu abi) bìmulonda.

¹⁴⁹ Mpindyewu, bu Nzambi. . . Mbanganyi bàdi bìitabuuja ne Èkèleeziyà wàkabangila ku Mpenta? Èyo. Mbanganyi bàdi bìitabuuja ne Nzambi mmuleejè patòoke ne mmwitàbe Èkèleeziyà wa ku Mpenta awu? Èyo, mukalenge. Díbà adi piikalàbi ne awu nguvwa Èkèleeziyà wa kumpalà wa Nzambi, ne ki cyòci aci cyàkabiikilàYe ne “Èkèleeziyà,” ne Yèyè ùdi Mwonji wà mvnyò mpindyewu, twètù biikàle matàmbà, bu Mwonji wà mvnyò awu mudidinge ànu mupàtùle ditàmbà dikwàbò, neciikalè cinyi? Cyà Mpenta’s. Èyowà! Mpindyewu, pàmwàpa kaciyi ku dína to. Mpindyewu tudi ne *mèna* à Mpenta, kàdi abi kî mbishiilàngàne ne ba-Méthodistes, ba-Baptistes, ba-Presbytériens, beena Mpenta nànsha. Aci kacýèna cyùmvwija cintu to, nwamònu’s, aci’s cidi ànu ndína cyanààna. Kàdi padìbi ànu ne udi ne dilabula dyà Mpenta mu mwoyi wèbè, Mpenta mu musùukà wèbè, ùkupèèsha Mwoyi wà Cyendèlèlè, díbà adi Nzambi mmukulayè ne: “Kwàkulengiibwakù kùdi lufù lwibidi to;” ne, udi ne Mwoyi wà Cyendèlèlè ne *kwèna muà*

kulengiibwakù kùdi lufù lwibìdi to. Nwamònu anyi? Udi ne . . . udi . . .

¹⁵⁰ “Kanùbungamiji Nyumà Mwîmpè wa Nzambì to.” Mpindyewu, kanùMubungàmiji to (kwenza bintu bìdi bibì). Wèwè mwenzè, neiyooobè bwà bwalu abu; bwalu Bible mmwambè ne: “Kanùbungamiji Nyumà Mwîmpè wa Nzambì unùdi batwibwe nendè citampì too ne ku ditùkù dyà bupikudi bwènù to.” Ncyà bushùwà anyi? “Kanùbungamiji Nyumà Mwîmpè to.”

¹⁵¹ Kaa! S’nediikalè ditùkù dilenga dilayà, dindà kampànda, dimwè dyà ku bikondo ebi. Bwà kunùleeja ne dibìikà dyà ku lufù nedìikalè dyà dyènzeka pa buloba bujima, “Nekwìkalè bàbìdi mu budimi, ne Nèngàngatè umwe; ne bàbìdi mu bulààlù, ne Nèngàngatè umwe.” Nwamònu’s, neciikalè bufùku mu mwaba kampànda, ne mundàamuunyà ku lukwàbò luseke lwà buloba; neciikalè dibìikà dyà ku lufù dyà dyènzeka buloba bujima, Dyambwibwa adi. Mpungi wa Nzambì neàdilè, ne yònsò wa ku yòyi eyi, wa ku èkèleeziyà mikesè eyi *apa, apa, apa*, nànsha mene kaamusumbà kakesè kàakapicilà *mwàmwa*, ne kapàtùke *emu, emu, emu* aka.

¹⁵² Pàvwà virgò awu, virgò awu pàakamònàye mu cilù cyà mwandamutekète ne . . . Mpindyewu, vùlukàayi ne, kùvwa virgò mwandamutekète. Ncyà bushùwà anyi? Anyi, ndi njinga kwamba ne, virgò yitaanu yàkapàtukà . . . Virgò dikùmi yàkapàtuka bwà katwilangana ne Mukalenge, yitaanu yìvwa yà lungenyi ne yitaanu yìvwa mikùtākàne. Ncyà bushùwà anyi? Nènkù mpindyewu, mu bilù abi nànsha nànkù, kùvwa bilù mwandamutekète. Nènkù ku ndekeelu kwà cilù cyà mwandamutekète (yìmwè yìvwa milààle kubangila ku *eci cilù, eci nùnkù, eci nùnkù, eci nùnkù*, ne *cyàcyà*, . . .), cilù cyà mwandamutekète, kupàtùkakù diyì ne: “Mònaayi, Mubàki nyawù ùlwa, pàtukàayi nùkatwilàngànè Nendè.” Ki kujuukayi è kulongololayi myèndù yàyi. Nènkù mikwàbò yònsò eyi kujuukayi myaba yònsò *eyi*. Kaa, aci kacýàkwikalakù cikondo cilenga cyà dikèma anyi’s wè!

Kaa, kale wàwa tuvwa twimba kaamusambu kakesè kàa ne:

Ncikondo cilenga be bwèbè wèwè,
Cikondo cilenga kaayìpu bwànyì mèmè’s wè;
Pùikalàbi ne twètù bònsò tudi tudìlongolola
bwà katwilangana ne Yesù Mfùmù wetù,
Cikondo cilenga kaayìpu cìikalàkù’s wè.

Mònaayi, twánjàayibi kumòna ní tudi mwà kwimba aci:

Cikondo cilenga be bwèbè wèwè,
Cikondo cilenga be bwànyì mèmè;
Pùikalàbi ne twètù bònsò tudi tudìlongolola
bwà katwilangana ne Yesù Mfùmù wetù,

Cikondo cilenga kaayìpu cìikalàku's wè. (Abi kabyàkwikalakù bilenga anyi?)

Kaa, kabyàkwikalakù bilenga kuntwaku, Katuyìkù ne bujitu bwà dyambula anyi?

Twimba ne disànka dyònsò ne tungonga twà mu myoyi twònsò twimba,

Kaa, kabyàkwikalakù bilenga kuntwaku anyi?

¹⁵³ Mbanganyi bàà kunùdi aku bàdìku bamanyè ne nenùkafikè mu mèènù? Mbanganyi bàdìku bamanyè ne nenùpatukè ku ciibi kwàka? Kanwèna bamanyè to. Mbanganyi bàdìku bamanyè ne panwàpàtuka nenùlwe cyàkàbìdì? Kwèna mwà kumanya to. Pa nàнку kùlekedikù dilòòlò edi dipita to; kwèdikù Nzambì màyi ku makàsà dilòòlò edi to, bwalu edi nidifwànyine kwikala dilòòlò dyà ndekeelu dyùdìku mufwànyine kupeta cikondo anyi mpungà. Wèwè mwinè udi nganyi's, twamb'eku twamb'eku? Udi mufùmìne penyì? Kùyaaya nkwèpì? Mukàndà wùmwèpelè pa buloba wùdìku mwà kukwambila cidì bwalu, m'Bible wa kale mubènèshìibwe ewu. Ne mwinè awu m'Bible utùdì twètù twitabuuja, ki Nzambì utùdì twitabuuja nyawù.

¹⁵⁴ Ne wèwè kùyi mubwelè mu Mukàjì-musèla awu, mu kaamusumbà kakesè kàà banyàabanyà aka, muyè mwinshì menemene *emu* leelù ewu mupàtula ku difimpakajìibwa dyà kùdì twitabàayi ne màngumba, ne bikwàbò, wèwè—wèwè—wèwè kùyi mu kasumbù kakesè aku . . . Mpindyewu, kabyèna bikèngela bwa wèwè kudìvwija mwena tabernacle ewu to, kabyèna bikèngela bwà wèwè kudìvwija mwena cintu kampànda to, bikèngela ànu ùlediibwè mu Bukalenge abu. Mpindyewu, wèwè muswè bwobùmwè bwènu mu ba-Méthodistes, ba-Baptistes, ba-Presbytériens, kwònsò kùdì mubùswilè aku, aci ncikutàngile. Wamònu's, enza bwobùmwè bwèbè ne muntu kanà yònsò ùdi muswè awu. Kàdi mèmè nènkwambilè cintu cimwèpelè ne: paùdì mulediibwe cyàkàbìdì, udi mumanye ne: “nyuunyi yà masàlà mafwànàngàne . . .” Ekèlekèle!

¹⁵⁵ Muntu kampànda wàkankonka mungà musangu, wàmba ne: “Mwanèètu Branham, wèwè's utukù mwambile bantu abu ne: ‘Alùkilaayi ku èkèleeziyà wa ba-Méthodistes.’”

Mèmè ne: “Bushùwà's. Bàbèlè pambèlu, nènku bàdi bàshààla kabàyi ne mwaba wà kuyabò to.” Nènku dìbà adi netùmonè . . .

Mbìmpè nàнку, bààlukilè, kabyàkwenza ntàntà mule menemene to, nwamònu's. Kabyàkwenza ntàntà mule menemene to, nebààlukilè buludì.

¹⁵⁶ Nudi bamanyè's, musangu kampànda mu . . . Noà . . . bwàtù, mwaba wa dikùbiibwa, Noà, kwàkalwa mvùla munène. Nènku ki Noà kulekelelayè cikòlòlò bwà kupàtukaci mu bwàtù amu, kàdi kuyaci ànu cyanààna cyènda cidila kò-kò ne cikènzakana eku ne eku. Mòna's, cyòci cìvwa cyumvwè bilenga, bwalu cìvwa nciminyi ànu kwìnè kwònsò aku. Cìvwa mwà kubùuka kuumuka

pa citàlù cìmwè cyà kale, ne kuukucisha difù ne kampundu aka, ne kuya kwàka pa ewu—pa mùkòkò wà kale ewu ne kuukucisha difù, ne cikwàbò cintu, bu mùvwàku ànu mìshindù yònsò yà bitàlù byà kale byà bintu myandanda mwaba awu.

¹⁵⁷ Pa nàнку cìkòlòlò cyòcì cìvwa ànu mwà kusòmba mwaba awu ne kudidilaku kò-kò ne: “Balùmyàna, ki mèmè kutwà cyanga cyà nkààyaanyi eku’s!” ciikàle ànu cìdila ànu kò-kò waci awu.

¹⁵⁸ Kàdi pàakalekelelèbo nkuci mukesè awu bwà kupàtukayè, yèyè úvwa ne ngiikàdilù mushiilàngàne. Mupùuyà mubolè awu, yèyè “kàvwa mwà kuwùtwàlakù to. Hmm!” Bwa cinyi? Nkuci kàtu ne kanyònga to; yèyè ki nyuunyi umwèpelè udi kàyi ne kanyònga to. Kàvwakù yèyè mwà kubipicisha mu dintumbu to, pa nàнку cintu cìmwèpelè cìvwàye mwà kwenza cìvwa nkwalukila ku bwàtù ne kukookola ku ciibi.

¹⁵⁹ Ndà wèwè ànu kwònsò kùdi muswè kuya aku. Cintu cìmwèpelè cìndiku mèmè nkulòmba bwà kwenza nkubweela ànu mu Bukalenge, kàdi ndi mumanyè kuwàya. Kwàkupetakù mwà kucitwàla kàbidì to, mwanèètù, newàmbè ne: “Nkààdi mumanè kupita mukàlu, nkààdi mumanè kushiya maalu à pa buloba aa paanyimà.” Èyowà’s, mukalenge. Ki mùdìbi cyà bushùwà.

Kaa, bàvwa bàdisangìshe mu cibambalu cyà kuulu,
 Bònsò munkaci mwà kusambila mu Dìna Dyèndè,
 Bàakabàtìijiiibwa ne Nyumà Mwîmpè,
 Ki bukolè bwà mudimu kulwabù;
 Mpindyewu cyàkabènzèlàYe bóbò mu ditùkù
 adi aci
 Yèyè neàkwenzèlè byà mwomùmwè,
 Ndi ne disàнка be mùndi mwà kwamba ne ndi
 umwe wabò. (Kwèna wèwè naadi anyi?)
 Umwe wabò, ndi umwe wabò,
 Ndi ne disàнка be mùndi mwà kwamba...
 umwe wabò; (Àlèluuyàh!)
 Umwe wabò, ndi umwe wabò,
 Ndi ne disàнка be mùndi mwà kwamba ne ndi
 umwe wabò.

Mbanganyi bàdiku ne disàнка bwà bwalu abu dilòòlò edi?
 Kaa, ekèlekèlè!

Lwàku, mwanèètù, kèba dibènesha edi
 Dyàkezulà mwoyi wèbè ku mpèkaatù,
 Dyàbangà kudidisha ngonga yà disàнка
 Ne kulama musùukà wèbè wulàkuka kapyà;
 Kaa, ki kulàkukadi kapyà mu mwoyi wànyi
 eku,
 Kaa, butùmbi kùdi Dìna Dyèndè,

Ndi ne disàńka be mûndi mwà kwamba...
umwe wabò.

Ndi umwe wabò, ndi umwe wabò,
Ndi ne disàńka be mûndi mwà kwamba...
umwe wabò; (Àlèluuyàh!)

Umwe wabò, ndi umwe wabò,
Ndi ne disàńka be mûndi mwà kwamba ne ndi
umwe wabò.

¹⁶⁰ Mpindyewu patùdì twimba citùminyi cidì cilondà eci,
ndi muswè bwà nùlabulanganàayi ku cyanza, munùtù
nwenza dilòòlò dyònsò amu, ba-Méthodistes bònsò, ne ba-
Baptistes, ne ba-Presbytériens. Labùlàngànaayi ku cyanza
muntu ne mukwèndè, ne biikàlekù nudyùmvwa ne musàngèelu
mukùmbàne bwà muntu údyà bàzòkà udi mukwèndè mudyè, bu
wèwè mwà kwenza nàńku. Mpindyewu ikàlaayi ne musàngèelu
wà menemene, wà menemene, biikàle bamanyè mwà kusòmba
ne bakwènù mpindyewu patùdì tuwimba apa:

Ndi umwe wabò, umwe wabò,
Ndi ne disàńka be mûndi mwà kwamba ne ndi
umwe wabò;
Umwe wabò, umwe wabò,
Ndi ne disàńka be mûndi mwà kwamba ne ndi
umwe wabò.

Nànsha mùdì bantu aba kabàyi mwà kuyiila
bwà kwikala,
Anyi kuditàmbisha bwà luumù lwà pa buloba,
Mbapetè bònsò Mpenta wabò,
Babàtìjìibwe mu Dìna dyà Yesù;
Ne bàdì bàlondelangana mpindyewu, ne kule
ne ku nseke ne nseke ne,
Bukolè Bwèndè bùcìdì ànu bùmwbèbùmwbè abu,
Ndi ne disàńka be mûndi mwà kwamba... .

Mpindyewu tùwimbàayi cyà bushùwà:

Kaa, umwe wabò, umwe wabò,
Ndi ne disàńka be mûndi mwà kwamba...
umwe wabò; (Àlèluuyàh!)

Umwe wabò, umwe wabò,
Ndi ne disàńka be mûndi mwà kwamba ne ndi
umwe wabò.

¹⁶¹ Udikù mwà kuswà bwà kwikala mufwìle diitabuuja
Bwèndè Yèyè pàmwè ne beena Seemùnà anyi? Byòbì
bikafikè mu mùshindù wà ne bìvwa bìkèngela bwà wèwè
kukùngamangana ne lufù anyi kuvila bwalu, udikù mufwànyine
kukùngamangana naalù anyi? Èyowà's, mukalenge. Èyi Nzambì
wa yaàya, s'ncifwànyine kwikala cyà cyèza milòwu's. Èyowà's,
mukalenge. Awu ki mùshindù wúndi mèmè muswè kuya, ànu
mu cyambilu mene amu. Ncyà bushùwà. Mvwa mwelè meeji ne

mvwa mucipetè ne bàvwa mwà kucipetela mu Allemagne emu àbidì àdì panshì aa. Kaa, bàvwa mwà kungaashila cingoma ku cyamù cikenkeci cyà lumwènù cyà bufùku, kàdì bàsàlaayi bàà beena Allemagne kulwabò bònsò lubilu kunjingabò ne kunsokokabò mùshindù ewu. Mèmè kudyàmbidila ne: “Ncifwànyine kwikala cintu kaayi cilenga bwà kufwà bwà Mukalenge wanyi mu budimi bwà bwambi emu mene.” Kaa, ekèlekèlè! Cintu kaayi—cintu kaayi cilenga’s wè.

¹⁶² Èè, lekèlaayi nnwímbilèku kaamusambu aka. Ndikù mwà kunwimbilakù anyi? Nudikù ne—nudikù ne díbà ànu bwà kaamusambu kakesè cyanààna anyi? Èyo. Ncyèna mumanyè mwà kukimba to, ndi nkàmba mu dyakula. Kaa, mèmè’s ntu misangu yònsò ànu muswè kwimba’s. Ne àmwè à ku matukù àdì panshì aa pawàya dyàmwàmwa ku cisòmbedi cyèbè cilenga cyà kuulu kwàka mu Mpàlàdiisò, lwà kwínshì menemene mu ndekeelu mwà meetu mwàmwa, mutwikalà mèmè ne Russell Creech bayè kalemba nyama emu, udi mumanyè’s. Kwínshì menemene mu ndekeelu mwà meetu mwàmwa mùdi kazùbù kakesè kàtù Mwanèètù Neville wimba mu musambu aku ne, *Ngìbàkìlèku Kazùbù mu Ditumba*, (Mvwa ndyàmbidila ne ùvwa wàkula bwà nzùbù wanyi mèmè.) mu *Ditungà dyà mu Butumbi*. Dìmwè dyà ku maadindà àdì panshì aa pawàpàtukà uya ku lutanda lwèbè lunène kuntwaku, ne ukènzakana mùshindù ewu, lwà kwínshì menemene aku mu ditumba adi neumvwe muntu kampàndà wimba misambu ne:

Ngàsà udi ukèmesha! Dìyì dipòle kaayi,
Dyàkasungilà mukèngeledi wa luse bu mèmè!

¹⁶³ Wèwè udi wamba ne: “Èè, Nzambi àbèneshiibwè, Mwanèètù Branham mukulumpe awu mmufike kùnu. S’ki yèyè awu, ndi mmuumvwa mwimàne mwaba awu mpindyewu mene, mwikàle wimba *Ngàsà Udi ukèmesha*.”

¹⁶⁴ Neciikalè ngàsà udi ukèmesha awu udi mumfikishemù. Ncyà bushùwà.

Kàdì ùdi ùzònta mashi, èyowà, (Ki bwà cinyi mèmè ndi nyiisha Eci.) ùdi ùzònta mashi,
Èvànjeeliyò wa Nyumà Mwímpè ewu ùdi ùzònta mashi,
Mashi à bayiidi bàakafwilà Bulelèlà abu,
Èvànjeeliyò wa Nyumà Mwímpè ewu mmutungùnùke ne kuzònta mashi.

Wa kumpàla wàkafwila ndongamu ewu wa Nyumà Mwímpè,
Ùvwa n’Yone Mubàtiji, kàdì yèyè wàkafwà bu muntu;
Pashiishe kulwakù Mukalenge Yesù,
kuMupoopelabò pa nkùrusè,

Yèyè ngwákalongesha ne Nyumà ùvwa mwà
kusungila bantu ku mpèkaatù.

Kùvwa Peetèlò ne Pòlò, ne Yone wa kwà
Nzambi,
Bòbò bàakafila myoyi yàbò bwà Èvànjeeliyò
ewu wàmòna mwà kukenkesha;
Bààkasambakaja mashi àbò, mwènzèlèbo kùdì
bapròfetà bàà kale,
Bwà Díyi dilelèlè dyà Nzambi dyàmòna mwà
kwambiibwa ne meeji matòòke.

Kùdì misùùkà mwinshì mwà cyoshelu,
(bafwile diitabuuja aba,) yìdila myadi
ne: “Too ne dībà kaayi?”

Bwà Mukalenge kunyookaYè aba bàdì benzè
bibì; (Tèèlejàayi! Lùkàsàlùkàsà!)

Kàdì nekwikalè bakwàbò kàbidì bààfilà mashi
à mwoyi wàbò

Bwà Èvànjeeliyò ewu wa Nyumà Mwímpè ne
lukòkà Lwèndè lukünze künzùù alu.

Ùdi ùzònta mashi, èyowà, ùdi ùzònta mashi,
Èvànjeeliyò ewu wa Nyumà Mwímpè ùdi
ùzònta mashi,

Mashi à bayiidi bàakafwilà Bulelèlè,
Èvànjeeliyò ewu wa Nyumà Mwímpè
mmutungùnùke ne kuzònta mashi.

165 Kaa, nekwikalè . . .

[Mwanèètù wa bakàjì kampàndà ùdi wàkula mu
mwakulu mwenyi, mwanèètù wa balùmè kampàndà ùdi ùfila
dyandamuna. Mwanèètù wa balùmè kampàndà ùdi wàkula
mu mwakulu mwenyi, mwanèètù wa bakàjì kampàndà ùdi
wàkula mu mwakulu mwenyi. Citùpà cyà mukàbà wà mèyi
munda mutupù. Mwanèètù wa balùmè kampàndà ùdi ùfila
dyandamuna—Muf.] Butùmbi’s wè. Amen. Amen. Hmm. Hmm.
Butùmbi’s wè. Amen. Èyowà.

166 Amen. “Ewu udi ne macì à kuumvwa, ùmwè cìdì Nyumà
wàmabila maèkèleeziyà.”

Ndi muMunangè . . .

Kuukwilaayi mpindyewu, kàdì nùmonè cyènzàYe. Pawikalà
kacya kùyikù muMunangè kwònsò eku to, udikù mwà kuswà
bwà ùMunangè mpindyewu anyi? Udikù mwà kujuukila kuulu
ne kuMujingulula, kuMwangata bu Musùngidi webè anyi?

. . . mèmè, (Nzambi àkubènèshè, mwanèètù wa
balùme.)

Ne wàkampetela . . .

Muntu mukwàbò ùdikù mwà kuuukila kuulu, kwamba ne: “Ndi Nendè dijinga, mpindyewu mene, ndi muswè kuMunanga anyì”?

. . .Lupàndu
Pa wà Kàvarìyò. . .

Nzambì àkubènèshè, mwanèètù wa bakàji. Nzambì àkubènèshè paanyimà apu, nsongààkàji.

Ndi muMunangè. . .

Ewu udi ne macì à kuumvwa, ùmvwè cìdì Nyumà wàmbila èkèleeziyà.

. . .Yèyè wàkannanga kumpàla
Ne wàkampetela lupàndu
Pa mucì wà Kàlvaryò.

¹⁶⁷ Taatù wetù wa mu Dyulu, paÙdì umòna bàsàtù aba biimànyìne kuulu apa, Éyì Nzambì, ndi ndòmba bwà Wèwè kwikalakù ne luse, Éyì Wa Cyendèlèlè Wanyi, ne bwà kubàfwila luse ku mpèkaatù yònsò, ne lupàndu, Nyumà Mwímpè mu nsòmbelu wabò, bwà kabàlu kulengiibwa kùdì lufù lwibìdì to. Bàdì bàfika ku dyumvwa, Mukalenge, dilòòlò edi, pàdìbo biimàne mwaba awu apu, ne—ne kùdì cintu kampànda cìdì pabwìpì. Nyumà Mwímpè ngudi mufile didimwija awu. Pa kumòna Nyumà wa Nzambì wìcikila munkacì mwà bantu, kuMumòna ùkwàta mudimu ànu bilondèshile Mifundu menemene, ànu mikenji yisàtù cyanààna kàdì kwimanyika. Éyì Nzambì, mukenji bwà muntu ne muntu.

¹⁶⁸ Mpindyewu, Taatù, tudi tuKulòmba bwà kwikala ne luse. Lekèlàku Nyumà wa musinga mukolè awu àshaalè munkacì mwètù. Swàku bwà tùMuneemèkèku, Nzambì; enzàku nàнку. Bwejàku misùùkà eyi mu bukùbì Bwèbè, Taatù, yidi mmamuma à ku Diiyisha dilòòlò edi, ne à ku mukenji wà kùdì Nyumà Mwímpè wùdì mwambiibwe munkacì mwètù. Nènku tudi tulòmba, Taatù Nzambì, bwà Wìkalakù naabò matùkù ónsò à mwoyi wabò. Ne swàku bwà “mu buloba bwà kabùyì ndekeelu” amu twatwilanganamù naabò, basùngila kùdì Mashi ne ngàsà wa Kilistò. Tudi tuKupèeshabò mpindyewu, Taatù, bújèku ne Nyumà Mwímpè Webè. Bwalu tudi tulòmba nùнку mu Dìna dyà Yesù. Amen.

¹⁶⁹ Nzambì ànùbènèshè, bàna bèètù bàà balùme. Yònsò uvwakù pabwìpì ne bantu bàvwà biimàne kuulu abu, beena Kilistò abu, bàlabùlèku ku cyanza pàdìbo basòmbè panshi apu, ùbàpèèshèku. . . ùbàjingìlèku dyàkalenga dyà kùdì Nzambì.

¹⁷⁰ Nudi numòna mùdì Nyumà Mwímpè ne ditùmikila, mùdìYe ùcyènza ànu ku ndekeelu mene amu anyì? Nwamònu anyì? Bible mmwambè ne: “Aba bàdì. . . bàdì bààkulà mu myakulu bìikalè bàbìdì, anyì kabàyi. . . bòbò bààbùngì basatu,” nudi numòna’s. Kì mmukenji pàncivwa nyiisha apu to, mpàkaavwàwu

wònsò mumanè kujika. Ki mùshindù wùdìbi ne cyà kwikala, bantu bònsò biikàle mu kaneemu kàà menemene ne bàtèeleja cìdì Nyumà wàmba. Kàdi cyènzèkì ncinyi? Bangènzàmpèkààtù bàjuukù bwà kunyingalalabò. Kaa, anji elàayi meeji. Nyumà Mwímpè Yèyè mwinè, kàyi ùcyàngata to... ne ku Díyi mene, mmulwè ne mwenzè dimwèneshiibwa.

¹⁷¹ Ndi mumanyè bàmwè bàà ku bantu bàdì bààkulà mu myakulu aba, ndi mumanyè bònsò bàsàtù bàkùlù aba; ne ndi—ndi mumanyè bàfidi dyandamuna abu; ndi mumanyè ne nsòmbelu wabò kèna ne mpèkaatù kumpàlà kwà Nzambì to. Mwanèètù Neville ewu, mpaasàtà wetù, mwambi wa ba-Méthodistes; mmwambi wa ba-Méthodistes, musòmbe mwab'ewu, mupetè Nyumà Mwímpè. Junie, udi apa ewu, Mwanèètù Jackson, muyiishi mukwàbò wa ba-Méthodistes, mupetè Nyumà Mwímpè. Ncyà bushùwà, biikàle ne dipà dyà kwakula kwà mu myakulu ne dyandamuna.

¹⁷² Nènku nudi numòna mutùdì tudítwala mu èkèleeziyà, muntu ne muntu mu kaneemu; Nzambì ngudi wakula awu. Nudi numòna mùdiYè wàkula menemene bilondèshile Bible; umwe; mukenji kawùyi wùmwika ànu bímpè menemene to, Udi ùwàmba cyàkàbìdì, kàdi Kàyi muswè kwakula kupita pa misangu yisàtù to. nwamònu's, bilondèshile Mifùndu mwaba awu. Nwamònu's, Yèyè ki wafila mukenji awu; Kacya Yèyè kàtukù ùbibwejakajangana to, “bwalu nyumà wa bapròfetà ùdi ùkòokela mupròfetà.” Bònsò bàdì bàtèeleja mu cimùmà cyònsò... .

¹⁷³ Mpindyewu mùshindù awu ngùvwà wùkèngelà bwà èkèleeziyà kwikalayè mu bulongàme. Mpindyewu bwà nwènù bàdì mwà kwikala kaaba aka bafùmìne pambèlu, bàdì bangumwè ncyàmba, mùshindù awu ngùvwàbì bikèngelà bwà kwikalabì. Nwamònu's, mukenji wùdi wùpàtuka. Nudi numòna bipeta abi anyi? Cìdì cyènzeka ànu *pa dîbà adi* mene. Cintu kampànda cìdì cyènzeka, ànu menemene mùdì dijingulula anyi nyumà mukwàbò kanà yònsò ewu. Yèyè kí mmulenga wa dikèma anyi? Kaa, mèmè's ndi ne disànkà dyàbúngì dyà kumanya ne ncintu cimwècimwè cìvwà Pòlò Munsantu mutùme díyi bwà kwenjiibwaci aci, *apa* mene, kí ncifwè to too ne *apa*. Cìcidi ànu cintu cimwècimwè aci. Kaa, ndi ne disànkà be mündi mwà kwamba ne ndi umwe wabò. Kí mmwòmò anyi? Èyo.

¹⁷⁴ Mpindyewu, mààlabà dilòòlò pa dîbà mwandamutekète jaajaaja, netwàngatè cikondo cyà Laòdikìyà, ne ki cikondo cyà *dibàkà* ncyòcì aci. Ndi muswè bwà nwàlwayi panwikalà ne mùshindù. Mvwa mulwè ànu pashiishe ndambù dilòòlò edi, bwalu pàmwàpa Nyumà Mwímpè ngudi wakula ne bikwàbò. Kàdi dîbà dìcidi ànukù, tuècidi ànu bu tusunsa makùmi àbìdì nànkù awu paanyimà pàà dîbà citèemà. Kàdi pa ciibidilu ntu mwab'ewu pa dîbà dikùmi anyi dikùmi ne ùmwè, pa nànkù aci nkumpàlà kwà dîbà menemene. Ne nwènù pèènu nudi nusànkila

ma—ma—mayiisha à Mukalenge anyi? Nudi nuàsànkila cyà bushùwà anyi? Àdi àdiisha musuùkà wèbè.

¹⁷⁵ Nzambi ànùbènèshè, nwènu bânà bàanyi. Nudi bamanyè's, mèmè ntu munùnangè ne mwoyi wànyi wònsò. Ne míngà misangu pàdì Nyumà ùmpya, ùdi ùkòsa byònsò bìbìdì... Mùshindù awu ki wùdì Dìyì, nDisàkisha mùdì mwelè wà mvità wà nseke yibìdì amu. Dìdì dikòsa mu dilwa, mu diya, munda, pambèlu, mu nseke yònsò. Kàdi aci ki cìdì cìtùtengulà's. Ditengula dìdì dikòsa ànu mubidi wà pamutù awu, bintu bìvwà kabiyi bikèngela bwà twètù kwikala naabi abi.

¹⁷⁶ Mpindyewu, ndi muswè bwà nùmonè. Nuumvu Nyumà mu dyandamuna amu dilòlò edì anyi? “Imànyikà dikùtakana adi!” Aci ncìdì citengulà. Ikàlà ne méeji matòoke! Twètù bònsò tudi bapàtùke mu njila, kàdi Nzambi ngudi mumanyè mwà kukòsa bikùnàkùnà abi kutùdì. Kí mmwòmò anyi? Ncyà bushùwà ne ki cìdìYe wènza. Mèmè ndi ne kusàkidila bwà bwalu abu. Kí mmwòmò anyi?

¹⁷⁷ Wèwè ki mwimbi mukèsè wa cisanji cyà pyànò kaaba aka anyi? Ncyèna mumòne... Teddy ùdi...? Ncyèna mumumòne kaaba aka mu mwaba nànsha wùmwè to. Ewu ki—ki...? Èyo, mwanèètù wa bakàjì, bu wèwè mwà kuswà. Awu mmwanèèbè wa bakàjì anyi, Mwanèètù Daulton? Mukàj'a mwanèèbè. Èyo. Inàbànza mutekète wa maalu mîmpè matàmbe, ndi ne disànka be dyà mùdì mwena Kilistò. Èyo, musambu wètù mulenga wà kale wà ditangalajangana naawù awu ngwèpi? Tùteetàayi wùmwèpelè, kumpàlà kwà twètù kucyènza, mpindyewu. Indilàku kakesè, mwanèètù wa bakàjì, kumpàlà kwà twètù kwimba *Angàtà Dìnà Dyà Yesù Wèndè Naadi*.

¹⁷⁸ Mbanganyi bàdì bamanyè *Kanùpu Mwoyi Disambila Dyà Mu Dìkù?* Mbanganyi bàtù bàsambilà mu dìkù dyàbò, dìkù dyèbè disambila? Kaa, abi's mbîmpè. Tùciteetàayibi musangu wùmwè, ànu mùvwà mu bikondo byà kale abi mpindyewu:

Kanùpu mwoyi disambila dyà mu dìkù to,
Yesù ùtu muswè kutwilanganamù neenù;
Yèyè neàngatè lutàtù ne lutàtù lwènù lwònsò,
Kaa, kanùpu mwoyi disambila dyà mu dìkù to.

Nutu banangè aci anyi? Tùciteetàayi cyàkàbìdì:

Kanùpu mwoyi disambila dyà mu dìkù to,
Yesù ùtu muswè kutwilanganamù neenù;
(S'ncipungidi, nwènù benza.)
Yèyè neàngatè lutàtù ne lutàtù lwènù lwònsò,
Kaa, kanùpukù mwoyi disambila dyènù dyà
mu dìkù to.

¹⁷⁹ [Mwanèètù wa bakàjì kampàndà ùdi wàmba ne: “Mwanèètù Branham, ndikù mwà kwamba cintu kampànda anyi?”—Muf.] Ncyà bushùwà ne udi mwà kwamba, Mwanèètù wa bakàjì. [Mwanèètù wa bakàjì awu ùdi ùbanga kwakula. Katùpà kàà

mukàbà wà mèyì munda mutupù.] Mwanèètù wa bakàjì Nash, abi's mbilenga be. Kaa, bu wêwè ànu mwà:

Twètù batwishùbwe katùyikù twela mpatà to,
ncyà bushùwà ne Yèyè neàkupàtùlè;

Ndà wêwè ànu ne majitu èbè kùdì Mukalenge
pashùshe ùàshiyèku.

Ùàshiyèku, ùàshiyèku

Ndà ne majitu èbè kùdì Mukalenge ne
ùàshiyèku;

Twètù batwishùbwe katùyikù twela mpatà to,
ncyà bushùwà ne Yèyè neàkupàtùlè;

Nda ne majitu èbè kùdì Mukalenge ne
ùàshiyèku.

180 Kanùtùkù banangè misambu yà kale ayi anyi? Kaa, mémè's ntu ànu. . . Ntu ngeela meeji ne bantu abu bàakangata kasàlà abu bàvwa bàsonsodùbwa kùdì Nyumà Mwímpè bwà kubala cyòci aci.

181 Byenzè bu mpofo Fanny Crosby pàakateetà bantu bàà pa buloba bàà mu ditùkù adi abu bwà kumufikisha ku difùnda misambu yà pa buloba, bôbò ne: "Mòna's, wêwè's newikalè mukàjì mubanji."

Yèyè ne: "Mémè ndi mulàmbùle mwoyi wànyì kùdì Kilistò, ne dipà dyànyì dyònsò." Úvwa mpofo, nudi bamanyè's. Yèyè ne: "Ndi—ndi ne dibànza dyà kufila mwoyi wànyì ne byònsò kùdì Kilistò." Yèyè ne. . .

182 Nènku díbà adi bàvwa bàmukwàcila ciiji bwalu wàkadyombola mpùngà wa nàнку awu. Yèyè kàakapàanyisha bwanàabutè bwèndè mùvwà Mukalenge Presley ne bakwàbò abu bènze to, kàdì yèyè—yèyè wàkashàala mulamè bululàmè bwèndè. Pa nàнку yèyè—yèyè. . . Bôbò—bôbò kumulekela, bàmba ne: "Dìbà adi pawàfikà mu Dyulu, kwòkò kwikàle mwaba bu nàнку," bôbò ne, "wêwè bu mùdì apa emu, s'newikalè mpofo." Bôbò ne: "Kàdì wêwè *mwikàle* mpofo," bôbò ne, "udi mufwànyine kuMumanya bìshi?"

Yèyè ne: "Mémè's nèmMumanyè. Mémè's nèmMumanyè."

Bôbò ne: "Kàdì wêwè *mwikàle* mpofo? Kàdì wêwè *mwikàle* mpofo?"

Yèyè ne: "Nèngùmvwè ku dilenga dyà bibangu byà misonso abi." Díbà adi yèyè kukùdimuka, kwasa lwendu kwalukila, ne kwambayè ne:

NèmMumanyè, nèmMumanyè,

Ne nèngiìmanè mupikula ku luseke Lwèndè;

NèmMumanyè, nèmMumanyè

Ku bibangu byà misonso mu byanza Byèndè.

183 Éyì Yesù wanyì, ne mpùtá yitaanu yà mushinga mukolè ayi, yidi yizòloloka mashi bwànyì mémè kuntu kwàka, mmunyi

mùndiku mufwànyine kuvila Yéyè wa mushinga mukolè awu? Ndekèlè mfwe, ndekèlè nye . . . Nye mùyaaya ní ncinyi cyònsò, kàdi ncividikù Yéyè wa mushinga mukolè uvwa uzòlologa mashi kuntu kwàka wàkamfwila awu nànsha. Éyowà.

¹⁸⁴ Nènkù paùdì umuka dilòlò edi apa, udi muswè kwangata: *Angàtà Dìná Dyà Yesù Wèndè Naadì*. Éyo, mwanèètù wa bakàji. Tujuukilàayi kuulu mpindyewu, bònsò cyàpàmwè.

. . . Dìná dyà Yesù wèndè naadì,
Wèwè mwànà wa tunyinganyinga ne dikènga;
Nedìkupè disànka ne busàmbi,
Ndà naaDi kwònsò kùyaaya.

Dìná dyà mushinga, (Dìná dya mushinga!) Éyì
dyà bupòle be! (Éyì dyà bupòle be!)
Ditèkemena dyà buloba ne disànkà dyà Dyulu;
Dìná dyà mushinga, (Dìná dyà mushinga!) Éyì
dyà bupòle be!

Ditèkemena dyà buloba ne disànkà dyà Dyulu.

Mpindyewu patùdì twinyika mitù yètù, ne twimba bitekètebitekète apa:

Twinamina Dìná dyà Yesù,
Tupòna mikookwela ku makàsà Èndè,
Mfùmù wa bamfùmù mu Dyulu netùMwasè
cifulu cyà butùmbi,
Pààjikà lwendu lwètù.

Dìná dyà mushinga, Éyì dyà bupòle be!
Ditèkemena dyà buloba ne disànkà dyà Dyulu;
Dìná dyà mushinga, Éyì dyà bupòle be! (Dyà
bupòle be!)

Ditèkemena dyà buloba ne disànkà dyà Dyulu.



60-1206 Cíkondo Cyà Èkèleeziyà Wa Seemùnà
Branham Tabernacle
Jeffersonville, Indiana États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org